


U d'of OTTAWA



39003002535903



Digitized by the Internet Archive
in 2010 with funding from
University of Ottawa

Le parement

& triumphes des dames.

Est appelle ce plaisant nouueau liure
Prenez le en gre ainsi que ie le liure
Pour recepuoir salut de corps & dames



¶ Prologue de ce present vo-
lume & plaisant opusculé dict
& intitulé Le parement & triumphe des dames

A Pres q' Ung iour de ce moys de may L'an. V.
cens & dix sur le milliare ieu seu & reuolue
plusieurs Volumes textes/postilles et com-
ments tant de sacree pagine que de aultres souverains
aucteurs hystoriographes cronicques/gestes/poeticques
cathologues des bienheurez saintz et saintes & autres
digne de memoire et singuliere recordation Esquelz
sans doute (es sens anagogique/tropo.ogique/alleg-
gorique & moral) sont escriptz narrez & recitez plu-
sieurs salutaires doctrines fructueuses instructions &
enseignemens de toutes bonnes meurs Et tant en sa-
gue diserte & latine soubz le doulz & meliflueux lan-
gage confit au sens de dame rethorique qui cy soy
eloquant art doratoire & souefue bouche de poeterie
aulex humains a present tant elucidée que nostre fran-
cigene locution & langue Vernacule a este tellement
deduicte/ que plusieurs subtilz esperitz & agilles enten-
demens/ par enuerue industrie se sont mis & donnez a
compiller & escrire argumens/commedies/inuectiues/
satiries/fables epigrammes & trogedies/prosaïques Ver-
sificatoires & rigmes de diuerses tailles/que plusieurs
liures & traictes/ont este notoirement diuulguez/moy-

PD
1565
L2A75
1870

ennant le noble & industrieux art de impression que en
Vigueur presentement donne & administre la source &
in Vndation de leuee Viue qui ince^{ssamment} part & dis-
tille du puis & profonde fontaine de Varies & diuerses
sciences Dont ainsi reclus & comme perpleux/considerât
que pour aucunement satiffaire aux humains entendez-
mens ie pourroye de nouueau compiller Ven & pressupo-
se que en quantite innumerable & si grande habédance
de diuers liures sont dispersez en latin Vulgaire fran-
coys & langue thentonique que a par^{ter} quasi rondement
plusieurs ny sceuent que choisir comme en Vne chose dif-
fuse tout pensif & fantasie me suis party de ma petite
estude Et pour mettre fin a mon emprise suis parueni
pour me solacier & recreer mon debile esperit insques en
Vng delectable & plaisât Verger tout couuert de noble
Verdure rameaux odorâs & arbres fructiferes dyapres
de diuerses fleurs ainsi que la saison le donne Quel-
lieu ie trouuay Vne moult louable cōpaignie & tres-
grant assemblee de prudentes nobles Magnifiques et
honnozees princeesses Dames damoyelles Bourgoyses
filles domestiques/plusieurs autres bien notables fe-
mes tresbien pareez acoustrez/& Vestues de diuers Ves-
temens & aultres triumpantes habitudes de quoy pre-
sentement chascunes d'elles sct Vser selon son degre et
personnelle qualite. Et plusieurs dicelles beaucoup plus
excessiuement qui ne leur debueroit competer ne apar-
tenir Le que pourtât ie leurs remet^z sans en Vouloir
riens autre dire/car ie suis cestuy la qui pour lhonneur

et grace des dames Vouldroye par le pal seruice traual-
ler ⁊ employer du tout moy scanoir. Dont icelle tres-
noble compaignie de dames de par moy saluez/et leur
salut a moy rendu/se tira deuers moy Vne bonne pru-
dēte ⁊ Vertueuse de me moyenne de aage ⁊ selon mō
aduis bien deuotemēt moriginee/de simple estat et plei-
ni de scanoir. Laquelle saige dame ainsi que ie fus deuez
ment informe estoit dicte et nommee bonne affection de
l'honneur ⁊ salut des dames/qui en mettant la coppie de
ce present liure en ma main/quelle auoit premierement
tire de sa manche me dist begnignemēt en ceste maniere
selon son maternel langage. Mon amy il ma este dau-
cuns recite que ta nagueres Venu de Troyes en cham-
paigne arriue en ceste tressamee illustre et populeuse cite
de Paris quiers a composer aucune chose de nouueau
affin que tu soyez recongneu/mais laisses encores Vng
peu quiescer et refreschir ta memoire mettant ta fanta-
sie arriere/et recoy ce present liure que ie te donne et ad-
ministre/duquel apres que tu auras Veu la coppie/et q
tu y sentiras goust/tu le pourras commenter et ordon-
ner/en forme qui puisse repaistre gens de lettre et aucto-
rite/et quil soit diuulgue au p nobles/haultes/excellen-
tes/et magnifiques princeesses/dames/damoiselles/et
autres femmes de tous estas/desquelles tu en Voys a
present Vne notable ⁊ honoree congregation affin que
par iceluy liure tu leurs puisses donner Vestemens et
habitx nouueaulx pour eulx parer et faire apparoir en
toute Vertueuse triumphe/comme tu scez quelles desirent

⁊ quil est notoire a chascun. Et a tant receu ses paroless/
⁊ comme tout morne et transsy/me departy de ceste noble
dame. Bonne affection de lhonneur des dames/prenant
humble congie de toute lassistance/ainsi comme ie peulz
et sceu. Dont moy hors de ce beau pourpris/et plaisant
Vergier/regarday bien diligemment ce traicte/et presēt
Volume/intitule le paremēt et triumphe des dāes Auq̃l
sont contenus to⁹ les habitz/paremens ⁊ nobles Des-
tures quilz appartiennent a toutes bonnes dames ⁊
femmes dhonneur. Lequel Volume ⁊ plaisant traicte/
sans iactance de moy/ou estre Vendeur des oeuvres dau-
truy/trouuay par son intitulacion que aultrefois auoit
este descript et compose par noble de cheualeremy sei-
gneur messire Oliuier de la Marche en son Vianant che-
ualier ⁊ grant maistre dhostel du roy de Castille Lequel
prudent ⁊ Vertueux cheualier tant en prose quen Vers
huitains a si bien ⁊ fructueusement laboure pour le bien
⁊ honneur des dames desq̃lles iay tousiours desire estre
hūble ⁊ loyal seruiteur. Parquoy ma fantasie du tout
arriere regettee/me suis seulement occupe a Deoir ⁊ Vi-
siter ce noble opuscule des dames non pas pour y riens
corriger/mais pour scauoir seulement se aucune cor-
ruption seroit ou auroit este faicte par eulx qui depuis
sont par coppie redige comme souuentefois est aduenū.
Et aussi pour commenter le texte/affin de monstrier le
prenomme seigneur y auoir songneusement laboure/⁊
par sens de lettre ⁊ estude/⁊ que tout noble ⁊ deuot seye
femenin ⁊ aultres gens de tous estas puissent prendre

seurs Vestemens / quilz par teignes / Vermisseaulx ou
aultre inueteration ne se puissent corrompre ne demolir /
mais perpetuellement demourer / ⁊ estre mis presentez ⁊
recôdez en l'ineffalible repositoire ou est tout baume aro-
maticque. En ensuyuant la irrefragable doctrine du
conuert / apostre / Vaisseau delection le glorieux saint
Paul disant que nous soions tousiours Vestuz ⁊ armez
des armures ⁊ Vestemens de toute lumiere pour ambu-
ler es iours honnestes / ⁊ du tout getter les oeuvres ⁊ les
Vestemens de tenebres / disant aussi le bon Jacob aux
familles de sa maison. Soyez tous mundifiez : ainsi
comme Draps purs ⁊ neetz / ⁊ mouez tous Voz Vestemens
desquelz aussi descript ⁊ recite le prophete Aemie quilz
ne peuent inueterer — Car ce sont les beaulx Vestemens
de quoy il est faicte notoire mention au liure des can-
tiques disant. Lodeur de ces Vestemens sera comme lo-
deur dencens. Et aussi est dict en aultres plusieurs lieux
de la sainte escripture lesquelz ie delaisse a present pour
euiter prolipite. Parquoy deuons ce present liure sou-
uentefois recorder ⁊ auoir en memoire de cuer pour
nous honnestement Vestir ⁊ parer par honneur / affin
que nous puissions personnellement ⁊ en reuerance com-
parer aux nopces celestes sans estre reprins de l'entree
comme il fut dit au repudie nō ayant sa Veste dhonneur /
mon amy pourquoy es tu icy entre sans ton Vestement
nuptial. Et ainsi par ce present petit Volume tresespe-
cial ⁊ tresdigne de grande louenge pourrons paruenir
aux supernelles nopces du parfaict espoux de noz ames

saufueur & redempteur Ihesucrist. Qui avecques le pere
& le filz Vit & regne glorieusement
en Dnye trinite.
Amen.

C La table de ce present liure du parement ⁊ triumphe
des dames Et premierement

C Le prologue de l'auteur

C Les panthouffles d'humilité Chap. premier
Exemple pour humilité de la glorieuse Vierge Marie
⁊ de la femme chananee

C Les souliers de soing ⁊ bonne diligence L. ii.
Exemple pour soing ⁊ bone diligence du roy David ⁊
de Nabal avecques sa femme Abigail.

C Les chausses de perseuerance Chap. iii.
Exemple de perseuerance de la benoïste Marie mag-
daleine

C Le iarretier de ferme propos Chap. iiii.
Exemple pour ferme propos de Lucreſſe noble dame
rommaine

C La chemise d'honnestete Chap. v.
Exemple pour honnestete de Polixenne noble pucelle ⁊
fille de Priam roy de Troye

C Le corset ou la cotte de chastete Chap. vi.
Exemple pour chastete de Virgineus qui occist sa fille
Virgine par son loyal consentemēt deuāt Alps Llau-
ditus

La piece de bonne pensee
Exemple pour bonne pensee de sainte Marie legiptiene

Chap. vii.

Le cordon ou sacet de loyaulte
Exemple pour loyaulte d'ung noble cheualier seigneur
de Varemboyn & de sa femme

Chap. viii.

Le demy ceingt de Magnanimite et fort de couraige
Exemple pour magnanimite & force de couraige de la
royne Semiramis femme du roy Nynus

Chap. ix.

Lespinglier de patience
Exemple pour patience de la bonne Griseliadis femme
du marquis de Saluces

Chap. x.

La bource de liberalite
Exemple pour liberalite d'une noble dame Contesse de
Vandosme & d'ung noble cheualier messire Anymond
de Pommières

Chap. xi.

Le consteau de iustice
Exemple pour iustice de la sage Desbora & de la noble
dame Judich comment elle occist Holopherne

Chap. xii.

La gorgerette de sobriette
Exemple de sobriette d'ung deuot homme catholique

Chap. xiii.

qui fut nomme Estienne Lorfenny et de la fille Marine
qui fut rendue auecques luy comme Vng religieux

C La bague de foy Chap. piii.
Exemple pour foy de la glorieuse Vierge Marie ⁊ dune
noble dame des Machabees nommee Anne de la Roche ⁊
de ses sept enfans tous freres/eulx tous ⁊ elle martiri-
see soubz Anthioeus Vng tirant payen

C La robe de beau maintien Chap. pV.
Exemple pour beau maintien de la noble Hester que le
roy Assuere espousa pour delaisser sa premiere femme
Vasti

C La ceiture de deuote memoire Chap. pVi.
Exemple pour deuotte memoire de noble dame Ioune-
nelle princesse de salerne qui se rendit religieuse

C Les gantz de charite Chap. pVii.
Exemple pour charite dune sainte dame nommee Go-
delyene martirizee au pays de flandres/ ⁊ dune aultre
noble dame nommee Gestrud fille du roy de Danne-
marche ⁊ femme de Renyer de sauoye

C Le pigne de remors de conscience Chap. pViii.
Exemple pour remors de conscience dune noble ⁊ pom-
peuse dame de la cite Dantioche dicte ⁊ nommee Pela-
gienne

C Le ruban de crainte de Dieu Chap. xix.
Exemple pour crainte de Dieu d'ung ieune prince de
Eleuent qui fut amoureux d'une bonne & deuote reli-
gieuse/laquelle se crena les yeulx

C Les patenostres de deuotion Chap. xx.
Exemple pour deuotiō d'une noble dame romaine/qui
conceut de son propre filz & depuis accusce du dyable

C La coiffe de honte de meffaire Chap. xxi.
Exemple pour honte de meffaire d'une bonne abbesse de
lordre de saint Dominique & de ses deuotes religieuses
qui toutes se cōperent les nez pour euitier Vice & peche

C Les templettes de prudence Chap. xxii.
Exemple pour prudence d'une noble dame contesse de
Haynault nommee Vauldunt & de son espoux noble
prince Haldeguaire Vincien

C Le chaperon de bonne esperâce Chap. xxiii.
Exemple pour bonne esperance de la noble Vierge saic-
te Cecille/de son espoux Valerien & son frere Tiburcien

C Les paillettes de richesse de cuer Cha. xxiiii.
Exemple pour richesse de cuer de sainte Cathrine de
Seines de lordre de saint Dominique

C Le signet ⁊ les anneaux de noblesse Cha. ppv.
Exemple pour noblesse de la bonne royne mere du roy
saint Loys

C Le miroer d'entement par la mort

Chapitre. ppvi.

Exemple du miroer d'entement par la mort en plusieurs
couppletz ⁊ alleguant plusieurs nobles dames ⁊ prin-
cesses decedez de ce mortel monde Ausquelles Dieu
Vueille pardonner Amen.

C Fin de table

C Prologue de l'acteur qui fut feu tresnoble seigneur messire Olinier de la Marche en son Vinant grât maistre d'hostel du roy de Castille.

Autre hyer lisant Vne nuyt pour apprendre
Après dormir que l'esperit medite
Amour me Vint assaillir ⁊ surprendre
Par tel assault qui n'est pas acomprendre
D'aucune dame qui mon sens suppeditte
Mon cuer la ma destinee ⁊ predite
Si fault scauoir se ie la dois aymer
D'amour amere/ou d'amour sans amer

Se sypure Ducil la sensualite
Je l'aimeray d'amour folle ⁊ mondaine
Mais selon Dieu raison ⁊ equite
Je dois aymer d'amour de charite
C'est la sente de loyaulte certaine
Boece nous dit que cest amour haultaine
D'aymer sa dame tousiours ⁊ en tout lieu
Pour le poulcer ⁊ mettre deuant Dieu

Le parement ⁊ triumphe des dames
Jeunes gorriers sil Vous plaist Vous sires
Mais quoy quil soit au salut de Vos ames
Pour chose Vaine en direz quelques blasmes
Car tel triumphe pas ne demanderes
Le temps perdu apres regretteres

Se folle amour Vous Vient au cuer saisir
Querant plaisance Vous aurez desplaisir

C Quest ce damour qui son fait a hante
Eisons Diuide/pour scauoir son guerdon
Il dit que cest Vng cuer en autre ente
Qui dessaisit sa franchise Doulente
Pour en autrui la mettre par pur don
Amans Venez a ce noble pardon
Dessaisissez Votre Doulente toute
Pour la donner ou le Vouloir se boate

C Qui son pouoir Deult offrir ou partie
Et du cuer faire quelque retention
Cest Vne amour laschement departie
Et qui abuse Vne dame aduertye
Dautre sercher ne face inuention
Cueur de noble homme par franche intention
Du quil se donne iamais ney doit partir
Pour endurer autant comme Vng martir

C Vng cuer Villain ne doit amours tenir
Jentens Villain qui pense Villannye
Amours est noble pour deuy cuers a Vnir
Et enchainner quoy quil puisse aduenir
Puis que Vertu cest enchainement lye
Cest amour sy pour riens ne se deslye
Ne departir iamais ne se pourra

Tant que le corps & lame durera

Et par contraire qui se met ou escoute
En amour faine qui se poursuit par Vice
Cest amour si ne dure peu ou goutte
Suspicion en ialouzie les boutte
Du beaulte fault qui est lasche seruiue
Car lung est fol lautre coquart ou nice
Cest amour est de legiere Venue
Et trop plustost se pert & diminue

Pourtant ie suis a cela resolu
Et fesmeneille de mon corps qui Douldra
Car iaymeray de franc cueur non posu
Par loyaulte celle que iay esleu
ferme propos en ce me soustien dra
Mon amour telle iamais ne fauldra
Amours se sont en moy fermes boutees
Pour trois raisons que iay leues & goustees

Amour entra premier en mon oreille
Doy les biens Vertus & renommee
De celle seulle ou mon cueur sappareille
Et puis quant loeil percent la non pareille
fleur de beaulte de grace inestimiee
Lors celle amour se trouua confermee
Rapport fut D'ay loeil en fist iugement
Ainsi fut prins en ce commencement

CD: Vient le neu damoureuse racine
Et le lyen qui plus moy cueur a pris
Soit en parler en acueil ou en signe
Son douly maintien la monstre ⁊ determine
Dauoir louenges en honneur ⁊ en pris
Toutes Vertus sont en ce lieu compzis
Le sens si bon quil ny a quelque amer
A scauoir doncques si iay tort de laymer

CDe ces trois dars/moy cueur a eu attainte
Qui dureront autant que iauray Vie
Regnom premier ne la peut faire estainte
Mais le regard a la blessure tainte
Qui ne sera sans grant douleur rauie
De lacointer ne fault que ie desuié
Mais doibs souffrir pour cy parfaicte ⁊ digne
A cueur seal Vault Vne medecine

CD: concluons a cest amour Douce
Que pourray ie pour guerdon dire ou faire
A la non per/quil luy plaise ⁊ agree
Pour satiffaire a sa bonte louce
Paindre ne suis pour sa beaulte pourtraire
Mais ie concluz Vng habit luy parfaire
Tout Vertueux/assiy que ien responde
Pour la parer deuant Dieu ⁊ le monde

CFin du prologue de lacteur

C Ly commence le parement ⁊ triumphe des dames
Premieremēt La pantoufle dhumilite Lhap. i.

R Dynes dhonneur marquises ⁊ picesces
Entendez cy dames ⁊ damoiselles
Femmes seruantes bo^z goises ⁊ maistresses
Venez partir a mes grandes richesses
Goustes les bien Vous les trouuerez belles
Mes pōpes sont es mau^{ly} nouriz nouuelles
Cest Vng habit a toutes bien apoint
Pour triumpher ⁊ estre bien cy point

Sachez premier que la Vierge Marie
Fleur des esclites ⁊ dame de bonte
Royne des cieul^y affin que ne varie
Qui fut la Vierge du bon yesse florie
Ainsi esclite pour son humilite
De sainte eglise est souuent recite
En son deuot ⁊ graticul^y canticque
Comme il est seu par louenge antentique

Pour cōmencer des pāthouffles nous fault
Pour mieul^y fournir ceste noble parure
Riens oublier ne Dueil car lhabit vault
Quil soit fourny du pied iusques au plus hault
Continuant ceste noble Vesture
La panthouffle est Vne saine chaussure
Au pied fait bien ⁊ prouffit cordial

Le quelle Dau't est bien espicial

LLa pantouffle cest le seul soubstenement
Du corps entier ⁊ de sa pesanteur
Mainte personne a garde sainement
Pour la sante cest Vng solagement
Pour tenir sec ou par douce moisteur
La pantouffle conduit le chemineur
Et obeyt selon quoy la conuoye
Par bon chemin ou par mal nette Voye

DDe la pantouffle ne nous dient que sente
Et tout prouffit sans griefue maladie
Pour luy donner tiltre dauctorite
Je luy donne le nom dhumilite
Lest des Vertus que Vne fleur anoblye
Pour Dieu madame que ce point soy noublye
Celle Vertu nous fera renommer
Depuis les mons iusques a la rouge mer

Celle panthouffle tout soustient ⁊ supporte
Et obeit par chemin seurement
Humilite le fais soustient ⁊ porte
De ce quoy doit quoy sent ⁊ quoy raporte
Et passe tout sans courroux doucement
Humilite plaist a Dieu seullement
Vng humble cuer ne sct riens requerir
Ne demander quil ne puisse acquerir

Humilite porte telle Vigueur
Pour auoir paiz & diuine con corde
Que par sa douceur & benigne liqueur
Remet le glaive de diuine rigueur
Dedans la gayne de sa misericorde
Je vous prie donc que Vostre Ven sacorde
A cheminer par Vraye humilite
Soubz qui a Jhesus pour nous milite

Lhauffons le pied dhumilite sans sainte
Laissons orgueil qui trop de maulx procure
Ceste panthouffle nous sera digne & sainte
Humilite nous soit de trement ceincte
Car qui craint Dieu il na de pecher cure
Humilite est de telle nature
Que Dieu se ioingt la ou elle est nourie
La Trinite & la Vierge Marie

Exemple de humilite

Pour le premier exemple & le exemplaire des
autres ma tresaymee & honnoree dame sera le
exemple de la tresglorieuse sacree & intemeree
Vierge Marie qui par sa sainte & benigne humilite a
merite destre dignement faicte Vierge mere de nostre
seigneur Jhesucrist royne des cieulx dâe des anges & re
paratrice de tout humain genre Comme elle mesmes
nous recite cothidiennemēt en son cantique de lheure de

Despres en nostre mere sainte eglise disant Pource quil
a regarde lhumylite de son ancelle Voicy que pour ceste
caue me dirôt estre biceureuse les gñatiōs ce que souuen-
teffois doit estre deuement recorde par deuote medita-
tion ⁊ auecques ce pour autre epeple familiere pouez li-
re leuangelille du second dimenche de Larefine ou Vous
trouuerēz q̄ Vne pecheresse de la terre de chananee obtint
grace ⁊ pardon de nostre seigneur Ihesucrist par son hu-
milite/car en Vlant par deuotion De faict de cuer ⁊ de
bon Vouloir fist sa complainte ⁊ humble remonstrāce en
disant Sire ie fais bien que ie ne suis pas digne dacq-
rir ta grace/mais regarde moy de loeil de pytie ⁊ mise-
ricorde ⁊ me impartiz des myettes de ta bonte ⁊ grace
pour guarir mon peche ainsi que souuent loy deyt au
chiens du relief de la table/affin dauoir leur poure Vie
Ainsi le benoist createur Voyant que si humblemēt elle
se comparoit au chens luy donna sa grace ⁊ pardon
de son peche Et depuis Desquit moult Vertueusemēt ⁊
reoura la sante de sa fille q̄ estoit malicieusement Ve-
pee ⁊ tourmentee du dyable Ainsi mes dames ⁊ filles
de moy escolle fūiez orgueil ⁊ prenez humilite Car nos-
tre seigneur Ihesucrist ainsi comme dessus est dit:print
aussi grant plaisir en lhumilite de la Vierge Marie quil
fist ou demourant de ses aultres Vertus qui sont infir-
mies. Et a tant Vous contentez de ce premier epeple/
rememorant aussi lhumilite de ceste poure femme cha-
nanee/et poursuiuons le demourant.

A Nq cordonnier nous conuient adresser
 Qui no⁹ fera des souliers p maistrise
 Pour le gēt pied de ma dame chauffer
 fait de tel art qui ne la puiſt bleſſer
 Telle facon eſt au^p ouuriers requiſe
 Gente chauffure chaſcun la loue ⁊ priſe
 Ainſi feront des ſouliers ſi apoint
 Qui nous Viendront ſe Dieu plaïſt bien apoint.

C Souliers gardent de mal ⁊ de bleſſure
 Les piez ſouuent dont le corps Vault mieulx
 Et ſil conuient cheminer bonne allure
 Sur le ſouler ſe fait ceſt aduanture
 Dont la pantouffle ſabandonne en maintz lieux
 Les ſoulers ſont ſi bons ⁊ Vertueulx
 Quilz prouffitent pour ſauluer Vng royaume
 Le loz lhonneur ⁊ prouffit dune dame

C Dont ces ſouliers/pour en faire apparence
 En la parure que Vouſons aconſtrer
 Lung ſera ſoing/ ⁊ lautre diligence
 En delaiſſant pareſſe ⁊ negligēce
 Dont moult de mau^x ſe peuent rencontrer
 Diligence paſſe ſens/il eſt cler
 Diligence Vainct dangier ⁊ fortune
 Et mainteſſois enuieuſe rancune

Diligence menee par raison
Vault tant de biens que l'on ne sçet le compte
Et selle meult de cas de deraison
De vengeance d'amours ou mespison
Il ne vault pas qu'on en parle ou racompte
Mais quant vertu diligence surmonte
Dieu en est guyde/menant a bonne fin
Le cheminant son desir & chemin

Exemple de soing & diligence

Nous lisons en la sainte bible ou .xxv. chapitre du premier liure des roys comment le bon roy David requist a Nabal/qui en faueur & recongnoissance des plaisirs & services quil luy auoit fais/il luy voulsist donner certaine porcion des biens de sa prouision pour recreer son armee Le que ledit Nabal luy reffusa/soy demonstrât orgueilleux ingrat & mauuais enuers luy/disant plusieurs iniurieuses et mauuaises parolles contre sa personne/dont finalement le bon roy David se courrouca et esmeut son armee contre iceluy Nabal & leust destruit sans poit de remede neust este Abigail femme diceluy Nabal/laquelle congnoissant la mauuaise obstination & ingratitude de son dict mary fist a soy descue telle diligence quelle chargea Lameaulx/chenaulx/& asnes de toutes viandes & vitailles en grant habondance. Et vint en personne au deuant du roy/lequel voyant la diligence & humilite de ladicte

Abigail mitiga son ire/ & se desista de son entreprinse.
Et depuis/apres la mort dudit Nabal recordez icelluy
roy David de la Vertueuse diligence de la dicte noble
dame Abigail/il la prinist a femme. Ceste dicte dame
nous aprent & enseigne que diligence est moult necessai-
re a toutes dâes & a cause deuiter plusieurs grâs maulx
qui par negligence sont aduenus & aduiennent souuent
en plusieurs & diuers pays.

Les chausses de persuerance

Chap. iiii.

Ayons ap's Vng chausselier dhonneur
q' no^r fera chausses po^r ma maistresse
Continuant cest habit de Valeur
Du plus fin drap du plus riche & meilleur
Dont loy pourra recouurer par adresse
Pour la sante/la chausse Vault richesse
Et quoy que chausses se monstrent a danger
L'habit est boy & ne se doit changer

La chausse tient la iambe nettement
Garde le froit: & cocuure la chair tendre
L'chausses se tirent pour estre gentement
L'chausses sont bieu sans nul encombrement
Loy ne les peut trop acheter ne vendre
La chausse est cointe/mais a se bieu entendre
Dy la Voit peu: & se doit retarder
Car elle aprouche ce quoy doit plus garder

CAlcomparons la Vertu ⁊ puissance
De ceste chausse de fin drap estoffee
Continuant leuure que ie commence
Nous en ferons bonne perseuerance
Sur les Vertus elle est recommandee
Perseuerance est serrure fermee
Du se garde le tresor de bien faire
Perseuerance est Vertu necessaire

Comme la chausse de bon drap composee
Plus obeyt/dont la iambe vault mieulx
Perseuerance est de bonte prisee
Et obeyt pour tenir l'assemblee
Des grans Vertus p tout ⁊ en maintz lieux
Perseuerance est Vng bien fructueux
En la laissant Vertus sont separees
L'honneur se pert dames sont desparees

CPerseuerons a suyure bonnes meurs
Fuyons oyseuse qui les Vertus reboute
Perseuerance en bien nourrit les cueurs
Enrichit lame/augmente les honneurs
Cest des Vertus la droicte passe route
Fuyons fuyons oubliance qui couste
Et fait perir bon renom loz ⁊ pris
Perseuerons se voulons auoir pris

C Jusque a la fin oy doit perseuerer

Commencement nest encoz oeuvre faicte
Et si doit on en bonne fin p̄ferer
Persuerant qui Veult bien operer
Pour tousiours tendre a bonne fin parfaicte
Persuerance na iamais de deffaicte
Cest Vng tresor tout noble & precieus
Persuerance conduit lame es saintz cieulx

¶ Exemple de persuerance

A Pres auoir Ven & Visite plusieurs Volumes
pour plus souffisamment escrire & monstres
mes alegations & mesmeint pour la Vertu de
persuerance ie me suis arreste de donner mon exemple
de la glorieuse Magdaleine/ & nay trouue dame digne de
ramener a memoire deuant elle en ceste partie la Mag-
daleine fut noble femme/reallement pecheresse/mais en
ses plus beaulx iours se repentit & conuertit a nostre
seigneur de cuer si cōtrit & honteux/qu'il luy pardonn-
na tous ses peches/pourtant quelle layma moult/& per-
seuera en cest amour depuis sa cōuersion tant que nostre
seigneur fut sur terre. Et apres sa mort lequist ou se-
pulchre/& tant lequist & traueilla & de si feruete amour/
quelle merita destre la premiere apres la glorieuse Vier-
ge Marie a qui il saparut apres sa resurrection. Et tant
perseuera en ceste sainte poursuite quelle le vit mon-
ter aux cieulx. Soixante ans Desquit la sainte dame
depuis sa dicte conuersion/dōt les. xl. furent employez

en Vne roche ou elle fist merueilleuse penitence sans
auoir confort quelconque / fors seulement de nostre sei-
gneur ⁊ des benoistz anges qui luy chantoyent constu-
mierement les heures du iour. Elle conuertit le roy de
Bourgongne Lay. viiii. dõt ledit roy aulme est demoure
crestien Son parrain se nommoit Trophonne qui fut
nepueu de saint Paul ⁊ en celle persueurace de biē faire
trespassa en Prouence / ou elle est glorieusement aoree
Et Vault bien la sainte dame destre memoze a la Ver-
tu de bonne esperance. Mes dames tenons le chemin de
la benoiste Magdaleine / oublions noz pechez de fait ⁊
de Voullente / ⁊ persueurons ou seruice de nostre seigneur
si en aurons tous bon loyer.

¶ Le iarretier de ferme propos

Lha. iiii.

O Raons nous / piedz ⁊ iambes parces
Mais il conuient auoir loeil ⁊ regart
Que les chausses qui sont si bien tirees
Soyent tenues gentement ⁊ gardees
De iarretiers par facon ⁊ par art
Que la chausse demeure de sa part
Ferme en la iambe sans tumber ou desmettre
Sans iarretier ne peult Vne dame estre

¶ Le iarretier se fait communement
Du propre drap courrant la iambe nue
Le iarretier lye estroictement

La chausse Va si bien & proprement
Quelle ne bouge ne descend ou remue
Le iarretier cest chose de Value
Et si honneste que homme ny doit main mettre
S'il na cest eur destre seigneur ou maistre

C Qui met la main iusque a la iarretiere
Il pretendra de plus hault aduenir
Cest des habitz Vne chose plus chiere
Gardez la bien de fait & de maniere
Sans grant dangier nul ne la doit tenir
Pour Vostre habit mieulx parer & fournir
A quel Vertu se doit ce iarretier
A comparer tant quil demeure entier

Le iarretier se doit nommer & dire
Ferme propos en bien: sans contrefaire
Ferme propos ne se pourroit desdire
Desir de bien est celuy qui attire
Toutes Vertus ensemb. e paire a paire
Ferme propos est au Vice contraire
Cest le lyen dont Vertus sont lyees
Pour les garder sans estre deslyees

Comme se tire le iarretier souuent
Du mesme drap dont la chausse est tailliee
Ferme propos nous procede & descent
Dautres Vertus/Quide si consent

Qui des Vices fait depart ⁊ meslée
Perseuerance est par ce point lye
Par double neu/⁊ qui ce point bien gouste
Le iarretier Vault beaucoup ⁊ sans doute

Cferme propos boy Vouloir poursuuons
Mettant arriere Variete de cuer
De ces Vertus pour pompes nous parons
Et corps ⁊ ame nous en esiouirons
Dieu des bienffaitz est remunerateur
Dung noble cuer plaisir est conducteur
Quant de Vertu se vont acompagner
Et ne Vouldroit plus riche donz gaagner

CExemple de ferme propos

Pour la raison de ferme propos recite ⁊ atteinz
Dre c.iiij. Bray/nous parlerons de la noble Lucie
cresse Laquelle apres quelle fut Viellée par
Tarquin filz du roy de Rome se delibera ⁊ ferma de
non plus Viure en celle honte Et continuant en son fer-
me propos se occist ⁊ tua de ses propres mains/sans doub-
ter ou craindre l'horreur ⁊ angoisse de la mort Et com-
bien que mōseigneur saict Augustin et autres docteurs
reboutent ⁊ regettent telle maniere de mort qui semble
desespoir touteffois Vault le cōpte de dire ⁊ reciter pour
ferme propos Et doit Vne noble dame auoir tousiours
ferme propos de bien faire ⁊ saict bien celle a louer ⁊ pri-

ser qui la Vertu garde qui entretient toutes les autres
quât Lucreſſe qui fut deſſe homicide eſt encoze aleguee
en ferme propos pource quelle euecuta ſon emprinſe con-
raigneſement combien quelle fuſt Viciuſe Soyôs donc-
ques en ferme propos de Vertus ⁊ reboutons toutes Va-
riabletez Viciuſes Car ferme propos eſt la serrure qui
ferme ⁊ tient encloſes toutes les bônes Vertus en la per-
ſonne qui eſt ferme ⁊ eſtable.

¶ La chemiſe dhonneſtete

Chapitre. V.

DUne ſingiere nous cōuiêt la maiſtriſe
Qui nous ſaiche faire coudre ⁊ tailler
Po^r ma maiſtreſſe Une bonne chemiſe
De riche eſtoffe car ie luy ay promiſe
Riens que tout bien ie ne luy quiers bailler
Le noble corps pour beau la pareiller
Se doit parer de chemiſe propice
Contre Venin de peche ⁊ de Vice

¶ De fine toile la chemiſe doit eſtre
Que doit Veſtir ſi noble perſonnage
Coille de liny ſe doit la entremettre
Les conſtures a dextre ⁊ a ſeneſtre
Doient eſtre de ſi ſubtil ourage
Quelles ne bleſſent car ce ſeroit dommage
La chemiſe Vault beaucoup en reco^rs
Car elle touche le plus noble du corps

Continuant nostre habit en bonte
Ceste chemise que sera ce en Vertu
Je luy donne le nom dhonestete
Que dames doiuent tenir en grant cherte
Qui nest honeste honte Va au dessus
Honestete Vault des biens beaucoup plus
Que Vne princesse ne peut pas exprimer
Le qui est bon se doit bien estimer

CSe la chemise est de fin lin tissue
Et nette ⁊ blanche ⁊ douce les coustures
Honestete est de raison cousue
Honte ⁊ Vergongne chascune sesuertue
Pour la monstrier sur toutes les Vestures
Honestete fait aux Vices iniures
Honestete toutes Vertus approche
Appete honneur ⁊ fait tousiours reprouche

Chonestete se congnoist en maintien
En beau parler respondre ⁊ enquerir
Honestete se doit/qui sentend bien
En tous estatx par querir le moyen
Sans raualler ne trop hault acquerir
Honestete se doit bien abstenir
De nulz tromper/ ⁊ plus destre trompee
Car la follic seroit trop achete

Chonestete soit deuant nostre face

Soyons honnestes & honte deboutons
Quant hardiesse de dame vient en place
Le iugement est de petite grace
Et par cuidoer nostre loz combatons
Honneste en fais quiers que nous apparons
Ma maistresse ceste Vertu guerdonne
Et fait auoir le renom destre bonne

CExemple de honnestete

MEttons en memoire & deuant nos yeulx lhonnestete de Polixene noble pucelle fille du roy Priam de Troye Laquelle Porrus filz du Dailant Achilles la fleur de cheualerie des grecz en vengeance de la mort dudict Achilles son pere consentue par ladicte Polixene par le regret quelle auoit de lhomicide fait par ledit Achilles en la personne du passeroutte de cheualerie du monde le preux Hector de troye frere d'icelle en empliant maulx sur maulx a celle lamentable destruction ledit Porrus sur la sepulture dudict Achilles son pere prist Polixene par les cheueulx de la main fenestre & de la destre haulsa lespee forte & trenchant pour la descendre sur la noble dame & elle en cest effroy de languoisse de mort. Le vent qui fut a celle heure grant & ipetueux se bouteda parmy ses vestemens la descouurant dont elle plaine dhonnestete prist a deux mains sa cotte simple pour la baissier & couvrir sa noble persone Et monstrant celle honnestete receut icelle Polixene

mort que toutes dames doiuent auoir en souuenir ⁊ dit
le saige que femme qui na honnestete de courir ses se-
cretz se feroit assez tost inger trop legiere marchande de
aucun deshonneur.

CLe corset ou la cotte de chastete

Chap. Vi.

Ag cousturier nous conuient preparer
Pour Vng corset dōner a ma princesse
Et son beau corps reuestir ⁊ parer
De noble abit pour la bien decorer
Car elle vault pour tout mettre en proesse
Le beau corset ie le vueil pour noblesse
Dung blanc damas de blancheur nette ⁊ pure
Cest Vng habit de royalle Vesture

CLe corset simple est bon ⁊ prouffitabile
A Vestir dames ⁊ les monstres valdir
Car le corset est habit si notable
Qui est plaisant a tous ⁊ agreable
Quoy qua danger on ne la puisse deoir
Et quant locil peult sa dame percenoir
En ce corset sans plus estre aournee
Il en vault mieulx la pluspart de lannee

CLe noble habit icy mis ⁊ bonte
Blanc en couleur affin que mieulx se voye
Nous lui donrons le nom de chastete

Cest Vng beau nom par Vertu achete
Cest des bienffaitz souveraine montioye
Chastete est le chemin ⁊ la voye
Pour mieulx garder Vertus sans separer
Chastete fait les dames honorer

Comme blancheur ne peult tache souffrir
Et ne peult estre par macule empirée
La chastete ne pourroit soustenir
Tache de Vice ne porter ne tenir
Franche Deult estre pource fut elle nee
Ceste Vertu ne vous soit oubliée
Soyez chaste en penser ⁊ en faitz
Si paruiendrez au regne des parfaitz

Le corset simple fait les femmes priser
Monstre bon corps ⁊ plaist a chacun ame
Que pourroit donc plus princesse aduiser
Pour auoir loz pour soy auctoriser
Que ce scauoir sans reprouche de blasme
Qui peult sentir de ce grant bien la flame
Il se repose de corps dame ⁊ de cuer
Au liet de ioye ⁊ parement dhonneur

Soyons tous chastes ⁊ dechassons luyure
Fuyons peche affin quoy ne perisse
Fuyons reprouche qui est lourde blesseure
Prenons habit de la riche parure

De chastete qui nous est si propice
Appellons Dieu ⁊ sa mere nourrice
Les inuocqueurs qui Vertus requerront
Ja ny faillirent ne iamaïs ny fauldront

Querons daller par tout teste leuee
Quitte de doubte de reproche ⁊ de honte
Crainte de Dieu ne soit pas destournee
Sans luy ne peult cest oeuvre estre menee
Car cest le maistre qui les Vertus surmonte
Cest le seigneur qui tout corrige ⁊ dompte
Qui peult le feu amendre ⁊ estaindre
Dont le tison fait a doubter ⁊ craindre

Par chastete tout honneur se maintient
Et par luy pure vient honte ⁊ villainye
Princesse chaste sobrement se contient
Dont sa pensee ainsi quil appartient
Est des Vertus toute heure premunie
Elle dechasse mauuaise compaignie
Folle plaisir ny peut auoir sa place
Les purs ⁊ netz verront dieu face a face

Exemple de chastete

Isez Valere Vous trouuerez comment Apius
Claudius Vng inge romain non pas Apius le
bon preudome qui deuit auengle mais fut ces

tuy secōd Apius hōme orgueilleux ⁊ desreigle en Vices
lequel fut amoureux d'une pucelle nommee Virgine en son
surnō Et la fist requerir pour auoir son plaisir par au-
cuns de ses seruiteurs ⁊ familiers en Vices ⁊ en malefi-
ces ce quelle reffusa par moult de foys Apius lors qui
se scanoit puissāt ⁊ iuge souverain praticanua par Vng
sic fatalite q̄ fist adiourner Virgine deuant le prenomme
Apius cōme iuge disant q̄lle estoit fille de sa serue ⁊ q̄l la
deuoit auoir cōme sa serue mais Virgineus son pere qui
fut de noble cuer mena sa fille Virgine deuant le iuge
pour ouir son iugemēt Apius iugea Virgie estre deliuree
a son satallite en espoir de l'auoir a sa Voulete mais le
pere pria de parler a sa fille auāt la deliurāce ⁊ luy de-
manda s'elle cōsentoit ladicte deliurāce Et elle respōdit
q̄ non ⁊ quelle aimoit mieulx mourir que pdr̄e sa chas-
tete A ce cōsentemēt Virgine⁹ son pere tira Vng grant
cousteau ⁊ tua sa fille Virgine de son gre ⁊ consentemēt
dōt toute rome fut scādalise Et dist Virgineus au iuge
Tirāt ⁊ deshōnestē iay fait sacrifice a Dieu pour la mort
de ma fille de son gre ⁊ de sa Voulete / q̄ ayme mieulx
mourir en chastete q̄ Viure Violēce ⁊ subiecte a tribut. Et
fait pl⁹ Virgine a louer q̄ souffrit ⁊ desira estre tuee par
son pere auāt peche / ⁊ se fist par aultruy occire / que Lu-
cresse qui de sa main se meurdrist ap̄s estre Violēce. No-
bles dames ayes le cuer de Virginite / car chastete entre
les philosophes est nommee la tressbelle Vertu / ⁊ qui
moult decoze Vne dame.

A Ne piece fault a ma dame auoir
 De cramoisy le plus ardent quoy face
 A la parer ne spargneray auoir
 Et si ne doit ne sentir ne scauoir
 Peche ou Vice en quelque lieu ne place
 Affin doncques que nostre habit perface
 Ceste piece humblement luy presente
 Qui seruira a nostre oeuvre presente

¶ La piece coeuvre le cuer & la force
 Le beau du corps & les nobles parties
 L'estomach tient la chaleur naturelle
 Par fois se monstre/par fois elle se celse
 La piece sauue beaucoup de maladies
 La piece pare/& laides & iolies
 Le quelle vault ie le declaireray
 Es plus briefz motz que faire le pourray

¶ Chascune piece ie lay approprie
 A la Vertu ou elle peult seruir
 Ceste piece pour mieulx estre nommee
 Vous soit ma dame dicte bonne pensee
 Qui Vous fera les Vertus maintenir
 Bonne pensee Vous soit en souuenir
 Qui pense bien ses oeuvres sont sans blasmes
 Penser a mal perit hommes & femmes

Comme la piece cuer & fourcelle coeure
Et fait au corps moult de bien & sante
Bonne pensee entretient & recoeure
Le noble cuer en Vertu & bonne oeure
Si dignement quil demeure en purte
Et lors se treuve de force conforte
Le cramoisy grace Dieu signifie
Qui les Vices estaint & mortifie

Pensons en bien & tout bien nous Viendra
Et reboutons pensees inutilles
Qui mal pense le Vice le prendra
Puis Vient peche qui tout desconfira
Par les pensees ce sont oeuvres subtilles
Entendez femmes soit de champs ou de Villes
Par bien penser on suyt le train diuin
Et par contraire on trespuche en declin

Bonne pensee Dieu tousiours retribue
Car cest celuy qui regarde le cuer
Et Voit la ou la pensee se attribue
Affin que grace a celle distribue
Qui des Vertus pense auoir la liqueur
Bonne pensee est de telle Valeur
Si souveraine & Vers Dieu autentique
Quelle maintient Vng cuer net & pudique

Exemple de bonne pensee

Di

Eurnissant la forme dont iay commence ce
present Volume me suis concludus pour la piece
de bonne pensee / de fonder mon exemple sur
Marie legiptienne. Pour ce quelle eust premier mauz
uaise pensee dont elle pecha ⁊ depuis par bonne pensee
recourra la grace du createur ⁊ est sauuee ⁊ sainte cō
me trouuer la pourrez en la Vie des peres / ⁊ mesmes en
la legende doree Et treuve que ceste Marie estoit degipte
⁊ pource fut nommee legiptienne ⁊ ne fut point de grant
signaige. En ses ieunes iours sadonna a luxure desor
donnee ⁊ publique ou elle continua longuemēt ⁊ se tira
en Alepandrie pour mieulx expecuter sa mauuaise pen
see ⁊ son peche sans reprehention de ses parens. Et ain
si se confessa ⁊ dist a Zozimas le bon Vieillard Vng saict
hōme qui dauenture se trouua es desers oultre le fleuue
Jourdain ou elle fist sa penitence p. xl. sept ans toute nue
⁊ nauoit nulle couuerture que de ses cheuculx. Et dit
lhistoire quey menant sa Vie pecheresse Vne moult bonne
pensee luy Vint en son entendement de passer la mer da
lepandrie pour aller adorer la croix de Jesucrist en Jhe
rusalem Si Vint a la mer les mariniers luy deman
derent argent pour la passer / ce quelle nauoit poit mais
Usant de sa legerette ⁊ continuant sa mauuaise pensee
leur habandonna son corps ⁊ sa personne pour en faire
leur voulente. Le quilz firent dont elle passa la mer. Et
quant les autres pellerins entrerent au temple ou estoit
la sainte croix elle ny peut être ⁊ si estoit la porte ou
uerte ⁊ par plusieurs fois seffaya d'entrer mais il ne luy

fut possible. Lors congneut elle quelle auoit courrouce
le createur/ & en parfaicte bonne pensee promettât amē-
dement Lors elle entra sans contredit. Puis batit & ma-
cera son corps/ & en pleurs & larmes s'agenoilla deuant
Vne ymage de la Vierge Marie: luy requist de bonne pen-
see & de cuer si hūblement luy promettant amendement
de Vie chaste & penitence/ Dont elle se trouua confortee/
fist son offrande fut consolce de la grace de Dieu Vng
aumosnier luy donna troyz deniers dont elle acheta
trois pains/ Vne Voix diuine luy dist quelle passast le
fleuve de Jourdaï & elle seroit sauuee ce quelle fist a tout
ses trois pains qui luy durerent en ses desers quarante
& sept ans/ou elle fut sans Voir homme que zozimas
qui la trouua toute nue. Car ses Vestemens furent pie-
ca pourris zozimas luy donna son mâteau pour couvrir
son corps pour plus longuement parler a elle il la Vit
essenee Vne coutee hors de terre/ en sa bonne pense Vers
nostre seigneur Lors l'ancien zozimas se smerueilla de ce-
te chose dont il benist & loua nostre seigneur Ihesucrist.
Et au prendre congie elle luy requist quil retournaſt au
fleuve a tout l'hostie sacree affin que de sa main elle peust
recevoir nostre seigneur Car depuis quarante sept ans
ne l'auoit receu & ainsi se departirent pour icelle fois re-
tourna zozimas au iour quil auoit pris & trouua legip-
tienne sur la riuē du fleuve Jourdain Laquelle fist le ſi-
gne de la croix & par miracle passa iceluy fleuve Jour-
dain marchant sur leaue comme sur terre/ receut son
createur en grande humilité/ puis ſey retourna comme

elle estoit Venue/et le prendhomme en sa religion. Le
 quel retourna lay ensuyuant passa le fleuve ⁊ Vint au
 lieu ou premier il auoit parle a elle. Mais il la trouue
 morte nouuellemēt/fut en question ⁊ pensa si l'ensepue-
 liroit la sainte dame ou non. Mais aperceut derriere son
 chief lettres qui disoient ʒozimas enseuclys le corps de
 Marie ⁊ rendz a la terre la cendre. Le boy Vieillart en
 grant traueil souyssoit la terre pour faire la sepulture
 a ce saint corps/ce dont il ne fust point Venu a chief
 pour sa Vieillesse ⁊ impotence / mais y Vint Vng lyon
 qui a ses griffes couurist de terre le corps miraculeusement
 Deist au saint homme : puis le lyon retourna au des-
 sert/ ⁊ le prendhomme en son abbaye ⁊ fut le lyon des-
 monstrance que la sainte dame auoit este lyon par
 Vaincre les Vices/ ⁊ habandonna mauuaises oeures
 par bonne pensee/dont elle gaigna paradis.

C Le coridon ou lacet de loyaulte

Cha.Viii.

A Ag coridon fault pour ma dame lacer
 De soye bleue pour mieulx lustrer labit
 Ny ne le peut trop gētemēt tisser
 Tant vault ma dame quoy la doit agenfer
 De telle estoffe quil ny ait contredit
 Le lacet lye le corps ⁊ la Vnyte
 Car cotte ⁊ piece entretient fermement
 Du mal iroit tout nostre habillement

¶ Le sacet tient le corps en sa droicteure
Le sacet tient la piece bien assise
Le sacet fait moult de tours par mesure
Pour mieulx servir a ce quil a de cure
Et tenir ferme la chose plus exquise
Le sacet Veult que son service on prise
Nom de Vertu luy doit estre donne
Pour estre mieulx nostre fait ordonne

¶ Le cordon bleu sera loyaulte dicte
Filie de foy & mere de prouesse
Loyaulte est parolle sans redicte
Vouloir sans fin en Verite confite
L'en damour qui ne rompt & ne cesse
Ceste Vertu appartient a duchesse
Car qui la pert noblesse diminue
Et ne doit plus pour noble estre tenue

¶ Loyaulte tient honnestete sans tache
Loyaulte tient chastete en son estre
Bonne pensee en loyaulte satache
Loyaulte est le crochet & satache
Du Vertu Veult avoir repos & estre
Cest le Vray scel lescripture la lettre
D'honneur/de sens bonte & preudhommie
Qui nest loyal honneur le ycommunie

¶ Soyons loyaulx faulcete soit chassée

Qui nest loyal il nest digne de Vivre
Par loyaulte amour est confermee
Loyaulte tient deu x cuers en assemblee
Sans departir ⁊ Vnion ensuyure
Loyaulte est le tesmoing ⁊ le liure
Enquoy amours escript les amoureux
Qui sont esleuz du nombre des eueux

C Se le sacet fait maint tours en laccant
Pour emploier leffect de son seruice
Loyaulte tient des chemins plus de cent
A bien seruir au lieu ou son cuer tend
Franc diligent ⁊ ne se montre nice
Loyaulte est Vne Vertu propice
Pour gaigner cuers ⁊ en bien rappeler
Vng fouruoie pour seurement aller

C Exemple de loyaulte.

I E congneus Vng seigneur de Darenbo moult
recõmande cheualier en honneur ⁊ Baillance.
Lequel me conta Vne aduanture a luy mes-
mes aduenue au propos de la Vertu de loyaulte. La pre-
miere femme dicelluy seigneur de Darenbo fut fille du
conte de Villars Lessay/celle dame se surnommoit de
Villars moult noble loyalle ⁊ Vertueuse dame. Cestuy
seigneur soymary/fut hõme amoureux ⁊ querant sa plai-
sâce ⁊ ne gardoit pas lors si bien la loyaulte quil deuoit

a sa femme touchant mariage comme il deust bien faire
Et Dray quil auoit en sa terre Vne poure ieune femme
nommee Jehâne Ramee Laquelle demoura ieune Veuue
⁊ sans mary Le seigneur la Vit belle sacointa d'elle moi-
tie amour ⁊ moitie crainte pource quil estoit son seigneur
⁊ tant quil en fist a sa Douleür ⁊ layma fort tāt q̄ en
celle poure maison de la Ramee il Venoit souuēt coucher
auec elle en Vne chābre biē mal parée ⁊ estoffee dūg pou-
re lit bien dur cōme Vng marterras en l'insculp de grosse
toille ⁊ souuēt mal buez ⁊ blanchis Et par folle amour
le cheualier se contentoit auec la Ramee. Comme il ad-
uient q̄ par espace de tēps les aduētures sont sceues par
rapors ou autrement la noble dame de Darēbon fut ad-
uertye q̄ son seigneur hantoit la Ramee Elle cōme Ver-
tueuse ne blessa ⁊ noublia point sa loyaulte mais Ver-
tueusemēt ⁊ par discretion manda ceste poure femme ⁊
par belle ⁊ douce parolles luy fist congnoistre son peche
dequoy elle ne fut p̄ icelle dāc mauuaisemēt traicte mais
luy enquist cōmēt elle traictoit ⁊ couchoit son seigneur ⁊
mary/q̄l lit/ ⁊ q̄l acoustremēt de l'insculp ⁊ de couuerture
elle auoit La fēme lui dist sa pourete dōt elle estoit hō-
teuse pource q̄ si hault hōme q̄ son seigneur elle ne pouoyt
miculx loger ⁊ recepuoir La noble dame consola la po-
ure creature en monstrant pfaicte lealle Vertu Luy fist
bailler Vng bō lit de duuet coissin ⁊ oreiller de mesmes
fins l'insculp ⁊ bonne couuerture Et luy dist mamye ie
Do^r baille puisio pour miculx ⁊ plus honnestement lo-
ger mōseigneur que Vous n'auēz peu faire Vous recōman-

dât sa sante ⁊ sa personne La poure femme print le pres
sent ⁊ ne demoura pas gramment que le seigneur de
Darenboy Vint bien tart a l'hestel de la Ramee trouua
sa chambre trop miculx estoffee quelle ne souloit dont il
fesmerueilla ⁊ luy demanda ou elle estoit si bien meu-
blee La poure femme luy compta cōment ma dame sa
compaigne l'auoit interroguee ⁊ luy fist le conte des de-
mandes ⁊ responcez ⁊ que aduertie estoit de sa peurete/
elle luy auoit donne l'estoffe de son lict doubtant quil ne
fust mal traicte en poure logis dont la sante de sa per-
sōne perist de pis Valoir En conclusion le cheualier fut
honteulx ⁊ repentant de son peche congneut la bonte ⁊
loyaulte de la noble dame sa fēme maria la Ramee ⁊ la
bandonna ⁊ depuis garda plus grant loyaulte a sa fē-
me quil n'auoit fait ⁊ ainsi l'une loyaulte rappelle l'aut-
re Qui doit estre a toutes femmes patron ⁊ exemple.

¶ Le demy ceingt de magnanime ⁊ force de couraige.
Chap. iij.

Au demy ceingt q̄ soit noir en couleur
Aura ma dāe po^r sō noble corps ceindre
Frere tout dor de ducas ou meillieur
Car ie congnois quelle est bien en Valeur
Pour la seruir sans fiction ou faindre
Le demy ceingt ne doit le corps estraindre
Mais soustenir les faictz ⁊ supporter
Des misteres que dame doit porter

C Le demy ceingt donne forme ⁊ parure
Sur le bon corps ⁊ affin quil flozisse
Il se doit Deoir par sens ⁊ par mesure
Lar cest des pieces que danger nous paincture
Cest Vng habit sans cuidier ne malice
En le monstrant se soit sans malefice
Telle Vertu comme ie monstreray
Selon le nom que ie luy bailleray

C Le ceingt sera de magnanimité
Que lon construit pour force de courage
Il sera noir pour monstrier fermeté
Contre les Vices ⁊ leurs auctorité
Nectant peche soubz les piedz en seruage
La ferrure/lor fin/ ⁊ louurage
Signifie la riche a constumance
Dauoir Vertus tousiours en souuenance

C Comme le ceingt nestraint le corps ne blesse
Cueur magnanime ne blesse mais conforte
Qui peult vaincre des Vices la rudesse
Il passe Hector en Vigueur ⁊ proesse
Par fermeté se monstra dure ⁊ forte
Panthasilée qui fut de Vaillant sorte
Vaincu na tant a l'espee trenchant
Que Vng petit cuer qui de mal se deffent

C Le ceingt soustient les menus Vtensilles

Et les Vtilz dont dames sont garnies
A les seruir comme femmes subtilles
Soient Vieilles/ieunes/femmes/ou filles
Pour estre mieulx triumphe bien fournies
Cueur magnanime prepare au corps les Vies
Et fait porter a Vne femme tendre
Le que Vng geant noseroit entreprendre

C Cueur magnanime ne se mue ne change
Pour parolles peur dure pour menace
Vice despise & se met en la fange
Peché destruit comme seroit Vne ange
Cest des Vertus la fleur & l'oultre passe
Force de cueur ne peult estre sans grace
Pource prions la Vierge quelle imprime
En nous la grace de Vertu magnanime

C Magnanimes soyons en tous noz faictz
Nostre courage en Vertu employons
Lasches desirs soient par nous deffaitz
Si paruiendrons au loyer de biens faictz
A nostre ayde ce bon Dieu appellons
De bon Vouloir le seruons & louons
La gist la force dun bon cueur qui desire
Vaincre les Vices tant que Vertu nempire

Exemple de magnanimité & force de courage

Auant rememoze plusieurs hystoires tant ap-
prouuees comme appocrifces Je me suis ar-
rester de donner pour exemple l'hystoire de la
royne Semiramis pour la Vertu de magnanimité &
force de couraige & me tairay de ses Vices pour ceste fois
Car le present que nobel cuer doit faire a sa dame ne
doit estre aourne que de Vertus Celle Semiramis fut fe-
me de Ninus roy des Assiriens ou gist la grâde & puy-
sante cite de Babilonne Apres la mort de son mary elle
tint & occupa par force d'armes le royaume Elle por-
toit habit de femme & cuer d'homme elle trouua la cite
de Babilonne comme a ruynee mais elle la refist la
plus forte la plus belle & la plus puissante dont on parlait
en ce temps/ & est merueille cō Dacere & Drose parlent
de ceste matiere Semiramis trouuailla en conqueste qua-
rante ans en armes & l'espee au poing elle accreut & aug-
menta ses seigneuries de toute Ethiope q̃lle conquist elle
entra en Judée & y fist plus de conquestes que ney fist A-
lepandre. Vng matin en pignāt ses cheueux luy fut
nonce q̃ la cite de Babilōne se rebelloit contre elle/ Usant
de son courage magnanime Voua a ses dieux & non ia-
mais trousser ses cheueux iusques elle eust remise sa cite
en obeissance Le quelle fist & print moult dure Vengeā-
ce de ses ennemis Elle eust du roy Ninus son mary
Vng filz quelle ayma plus quelle ne deuoit elle cut ba-
taille cōtre ce puissant roy Sirus a ordōner ses batailles
elle fut en grant debat en son cuer se elle conduiroit la
p̃miere compagnie pour a border a ses ennemis ou selle

y enuoiroit son filz q̃lle aymoit plus que soy me^mes Et
conclud dy enuoyer son filz contre s^o plaisir mais cou-
ragement le fist pour garder lh^oneur de son filz comme
h^ome A ce premier rencontre fut son filz tue qui furent a
Semiramis dolozeu^{es} les nouuelles Mais en courage ma-
gnanime elle empoigna lespee trenchant Vigoreusemēt
& dist iayme mieulx aujourd^{huy} Venger la mort de
mon filz par armes employees que par effusion de lar-
mes perdues/se ferist en la bataille par grant hardiesse
descōfist son ennemy & fist luy & ses g^{es} douloureux-
ment mourir & trouue que Nynus estoit le premier roy
couronne qui oncques fut Et Semiramis la premiere
royne & conclud donner exēple a toutes dames que
magnanimite au^y armes demeure a celle royne Si p^{ne}z
force de courage pour esister & Vaire les Vices & en ce
faisāt Vous triumphez en Vertus.

Le spinglier de patience

Chap. v.

Recourer fault en lhostel dun mercier
Et bien choisir dedans sa mercerie
Pour quelque pris quon puisse ap^{re}cier
Vng tabourin quon dit Vng espinglier
Pour mieulx estre ma maistresse sortie
La ceingturette en doit estre garnye
Cest des Vtilz lung qui fault preparer
Espingles fault pour les dames parer

Cest espinglier doit auoir couuerture
Dun beau drap dor pour princesses seruir
De drap de laine doit estre la bordure
Pour des espingles recepuoir la pointure
Cest soy mestier ⁊ si doit asservir
Dames le doiuent bien garder ⁊ cherir
L'espinglier donc vient a point a ce pas
Et a tel heure quoy ne le croiroit pas

En conduisant nostre oeuvre par science
Al'espinglier quel don luy donrons nous
Nous en ferons Vertu de pascience
Fille de sens ⁊ mere de constance
La Vertu sert a toutes ⁊ a tous
Gardez ce bien nobles dames pour vous
Pascience cest la fleur ⁊ digne perle
Des grans Vertus dont on escript ⁊ parle

Se des espingles on picque perce ⁊ poingt
Cest espinglier qui endure soffice
Lueur patient en sa Vertu se point
Qui porte tout ⁊ si ne se sent point
Faict ne parolle iniure ne malice
Pacience porte tout fors que Vice
Car patience fuit tout peche par droit
Et aussi Dieu autrement ne Voul droit

Cest espinglier se doit riche estoffer

Pour presenter a princeſſe ſi noble
Signifiant quil ſe doit honnozer
Plus riche don ne peult Dieu conferer
Leſt des grans biens le Vert & le ſi noble
Leſt eſpinglier Dault plus que eſcu ne noble
Leſte Vertu prennent en bonne part
Toutes dames qui en auront leur part

CLe bort du drap qui ſeuſſre les pointures
Des eſpingles nous eſt ſigniſiance
Que pour pompes richesses ou Veſtures
Nous ne ſommes que pources creatures
Subiectz a Dieu ſelon la prouidence
Pour Vng plaifir Vng cent de deſplaiſance
Si nous conuient paciemment ſouffrir
Se corps & ames Vouſons a Dieu offrir

Pacience par raiſon enduree
Vainct deſplaiſir/courroux/deſpit & deul
Pacience de couraige portee
Conforte corps/entendement/pensee
Oſte regretz tant du cuer que de loeil
Pacience deſpite tout orgueil
Leſt des Vertus leſtandard & penon
Pacience nous fault Vueillons ou non

Exemple de patience.

Ambien que ie treuve tresprouu en allegnant
de patiee le conte de Griseliadis touteffois ie
le treuve si bon & si bien sert en ceste matiere
que ie me ressonbz & conclus de le reciter en ce present Vo-
lume & peut estre que aucunes dames pourront ouyr ces-
te memoire & recordation quelles y pourrôt prouffiter ce
que DieuVueille. L'hystoire dict que Eustace marquis
de Saluces fut Vng ieune prince beau cheualier & fort ay-
me de ses subgetz/lequel ne se Vouloit pour aucuns re-
gardz marier combien que plusieurs princes eussent biē
Voulu son alliance & mesmes les estas de ses pays le
desiroient pour auoir de luy lignie pour la seurte & en-
tretienue de sa seigneurie & tant le presserent par remon-
strances quil acorda de soy marier pourueu quil choisi-
roit alliance a son plaisir comme cestoit raison. En sa
seigneurie demouroit Vng honnestre Vieil hōme pource et
de petite Venue nomme Jehā Nicolle qui auoit Vne fille
nommee Griseliadis sur laquelle est fōde le temple de ce
presēt compte Ceste Griseliadis estoit ieune de quinze ans/
belle/dilligente & de bōne meurs seruoit son pere son-
gneusement/ estoit humble & deuote & fort recommandee
par regnom en Vertu Le marquis estoit prince humain
& souuenteffois se deuisoit avecques Jehan Nicolle le-
quel estoit saichant homme & luy scauoit parler des ad-
uētures aduenues de son temps & mesmes des faictz &
conquestes des marquis de Saluces ses predecesseurs a
quoy le marquis Eustace prenoit grāt recreation & plai-
sir il Deoit nō pas seulement la grant beaulte de Grise-

lidis : mais ses meurs gestes ⁊ conditions qui luy fu-
rent moult agreables finablement il conclud en son cou-
rage de prēdre Briselidis pour sa femme ⁊ espouse fist
faire grant appareil manda les seigneurs ⁊ dames de
son pais fist faire riches habitz pour sa fēme q̄ deuoit es-
tre amenee par ses parēs a Vng io^r nōme tint maniere
daller en sa personne ⁊ grant cōpaignie au deuāt d'elle
⁊ tout droit Vint descendre a l'ostel de Jehā Nicolle / ⁊
requist au preudhōme q̄ luy donnast sa fille en mariage:
le preudhōe fut tout hōteu y aussi fut la fille ⁊ tous ceulx
q̄ la furēt / mais le marquis la voulut auoir ⁊ la / la fian-
ca de main de prestre / dames descēdirent qui la Vestirēt
⁊ aornerēt de riches draps ⁊ de precieuse courōne fut em-
menee la fille Jehā Nicolle en grant triūphe a Salu-
ces a la grant eglise ou le marq̄s lespousa solēpnelles-
ment ⁊ fut la feste grāde ⁊ planiere coucha avec elle ⁊
assez bref ⁊ bien tost elle fut enceingte dōt tout le pais
en fut moult resiouy / dont cy ap̄s traicterōs des paciē-
ces de Briselidis pource que cest le patrō que nous Vou-
lōs baillier pour exemple. La marquise sacoucha ⁊ fist
Vne fille qui fut solēpnellement baptisee ⁊ fut nom-
mee Elizabeth / le marquis qui fut homme subtil ⁊ de
fort couraige praticqua pour euecuter son desir ⁊ Vou-
lut essayer ⁊ prouuer la constāce ⁊ obeyssance de sa fem-
me. Et par Vng matin ētra en la chambre dicelle sa
femme qui gisoit en son liet / fist chacuy partir de la
chambre y luy dist quelle ne ignoroit pas quelle ne fust
fille de Jehā Nicolle poure fille ⁊ de petite extraction ⁊

que les parens de luy qui estoient princes ⁊ de grant lignage nētendoiet poit q̄ la lignie Venuë de si petit lieu a cāc d'elle deust succeder a si haulte seigneurie/ ⁊ que en effect il Vouloit celle leur fille faire mourir pour com-
plaire a ses parēs: la dame luy respondit paciemmet Monseigneur le fruyct est Vostre/ Vostre gre soit le plaisir de Dieu. Le marquis deuant elle print l'enfant au ber-
seau ⁊ asses rudement le liura es mains de deuy Bar-
letz/ ⁊ leur dist quilz fissent de son enfant ce quil leur auoit commande ⁊ que plus ney ouyst parler ⁊ cōmanda
a sa femme/ que ses femmes reuenues a elle/ elle leur deffendist sur leurs Vies de poit parler ou enquerre de
lenfant/ ce quelle fist ⁊ celle douleur porta si paciem-
ment que depuis Vng semblant ne fist de celle aduēture
Dedans lan apres la bonne marquise acoucha d'ung filz
qui fut baptise ⁊ nomme Jehan de Saluces. Et quant
le marquis qui Voulut persēuerer a tempter et a esprou-
uer sa femme Vit l'enfant si grandelet que la mere le pou-
uoit auoir entre ses bras pour la seconde fois il dist a sa
fēme telles parolles quil auoit fait quant il luy osta sa
fille ⁊ luy declaira quil Vouloit son filz faire mourir
pour les raisons dessus alleguees ⁊ escriptes La mar-
quise plaine de Vertueuse patience/ s'elle auoit la pre-
miere fois obey ⁊ humblemet respondu elle ne declina
en riēs mais tousiours remist le tout au bon plaisir de
sō mary lequel print son filz entre les bras de la mere ⁊
en sa presence le deliura es mains es deulx sathalites ⁊
aigrement leur commanda de faire du filz comme de la

fille ne iamais la marquise ney fist depuis Vng seul
semblant a son seigneur & mary Le marquis ne fut
point assez content de lespreuue quil auoit faicte sus sa
femme/par la perdition de ses deux enfans. Mais Vou-
lut approuuer par greuer & faire tort a la personne del-
le. Et quant il vit quelle ne portoit plus nulz enfans il
continua son fort & merueilleux couraige & luy dist.
Griselidis tu scez comment au regret de mes parens &
de mes subiectz ie tay prinse a femme/fault que ie leur
complaise si ie ne Dueil perdre ma seigneurie & mettre
mon corps en danger & quil soit Vray desia ma conuen-
faire executiō de mes propres enfans & de rechief me
contraignent de toy habaddonner & de te renuoyer en la
maison de ton pere. Et a leurs despens ont obtenu du
Pape Vne dispence de me pouoir remariier a Vne aultre
haulte noble femme Affin dauoir noble lignie pour ob-
tenir la seigneurie Et aisi fault que ie le face. Si man-
de prestement Jehan Nicolle tō pere/quil te viengne que-
rir & que plus ceans ne te voye & a Dieu te dis. Griselis
dis se mist a genoulx & doulcemēt luy dit en pleurs &
en larmes Monseigneur Vostre plaisir soit fait/le mar-
quis se retira en Vne chambre. Griselidis manda Je-
han Nicolle son pere/luy declaira la Voulente du mar-
quis/par quoy le pere emmena sa fille en sa maison &
luy auoit garde ses pources & petis habillemens dont
elle destit sa personne/& se mist a seruir son pere & faire
ses petis affaires & Viure de sobres metz & petites Vian-
des ainsi que deuāt & print le tout en si bonne pacience

que tous les Voïfins fefmerueilloient de la Vertu delle/
⁊ ainfi demoura longue eſpace. Le marquis qui ſcauoit
comme Griſelidis conduiſoit ſa Vertu ⁊ ſa pacience.
Si penſa de faire de plus en pluſſort pour attaindre ſa
Voulente/ ⁊ fiſt ſemer que Vng grant prince luy auoit
accorde ſa fille en mariage et quil auoit pris iour
au quinzième de may que celuy prince luy deuoit en-
uoyer ſa fille par le frere delle pour coſumer ⁊ par-
faire le mariage/ fait ⁊ paſſe entre les parties/ fiſt le
marquis grant appareil ⁊ manda grant nobleſſe com-
me en tel cas appartient/ ⁊ le iour quelle deuoit Ve-
nir il manda a Jehan Nicolle quil luy enuoyaſt Griſe-
lidis pour ayder aux aultres femmes a mettre a poit
la maiſon ⁊ quelle fiſt le ramô ⁊ balay en la maiſon
me la mendre de toutes. Ceste dame fut arriuee moult
belle ⁊ pouoit auoir quatorze ans ⁊ ſon frere treize/ ⁊ re-
miſt le marquis la ſolemnite deſpouſer iuſques au len-
demain a diſner/ ſe aſſirent leſpouſee ⁊ ſon frere a Vne
table/ ⁊ toute la nobleſſe/ es aultres tables de celle ſalle
⁊ la Venoient gés de tous eſtas tant pour Voir la dame
des nopces comme pour Voir leſtat ⁊ le diſner. Le mar-
quis ne fut point en celle aſſemblee ⁊ comme ſur la fin
du diſner/ il Vint ⁊ regarda Griſelidis qui regardoit la
dame des nopces. Et luy demanda Griſelidis que te
ſemble il de ma femme/ elle luy reſpondit humblement.
Monſeigneur elle me ſeble belle ⁊ dapparence de grant
bonte. Et en ce diſant ſe tira pres du marquis ⁊ en ge-
tant aucunes larmes luy diſt / monſeigneur ie Vous

prie en l'honneur de Dieu que Vous espargniez ceste ieune
 princesse & ne luy faictes les durtes & rudesses que
 Vous mauuez faictes/car ie croy quelle ne le pourroit por-
 ter sans mourir. A ce mot se Voulut retirer Griseliadis/
 mais le marquis qui se trouua le cuer serre/la print
 par la main et dist tout hault Griseliadis ta pacience ma
 vaincu. Saches que ces deux enfans sont miens & tiens
 & sont ceulx que tu entendoies que ieusse fait murdrir.
 Mais ma propre seur les ma nourris iusques a cy Et
 pour esprouuer ta pacience ie t'ay faict les griefz que tu
 as Vertueusement portez ie te tiens pour ma femme ne au-
 tre ne Vueil auoir. La recongnissance de la mere & des
 enfans est piteuse a recorder/la dâe fut reuestue môlt
 hõnorablement Jehâ Nicolle fut fait cheualier & grât sei-
 gnr Le marqs Desqt aucqs sa femme le demourât de ses
 iours en grât paiz & amour. Or mes dames prenõs epe-
 ple en Griseliadis qui par sa pacience acquist telle gra-
 ce/qui Viura tousiours en bõne renommee.

¶ La bource de liberalite.

Chap. vi.

A De bource quoy dit Vne aulmosniere
 Nous conuiet pèdre a ceste ceinturette
 Dor & de parles bien brodee p maniere
 Tant quelle appere de grant Valeur & chere
 Madame Vault d'auoir chose si faicte
 La bource doit pour estre plus par faicte
 Auoir sermans pour seurement garder

Le que princesse Deult tenir ou donner

La bource peult ⁊ si est bien lyce
La bource garde aumosnes ⁊ biensfaitz
Que princesse doit donner la iournee
Sans la bource dame nest pas douce
De ses Vtilz necessaires parfaitz
En apprenuant ce que ie dis parfaitz
La bource aura en fructuosite
Le propre nom de liberalite

La bource peult sur ce deuons entendre
Que noble cuer doit en lair tousiours estre
Pour aumosner pour donner pour despendre
Quoy le demande/oy ne se doit attendre
Qui sct donner il est des cuers le maistre
Les serrans sont le secret de la lettre
Signifiant la bource non ouuerte
Pour auoir loz ou pour don sans desserte

Laumosne doit estre sans Vaine gloire
Mais doit donner a la necessite
Tant quan p biens fais oy ne se doit acroire
Qui fait plaisir quer donner ⁊ ancoire
Cueur liberal na iamais pourete
Mais garder fault que prodigalite
Ne face tant que nous soyons souffrans
Pource sont mis es bources les clouans

Chaſcune femme ne peult pas bource auoir
Dor & de ſoye richement eſtoffee
Et ſi ne peult de partir tel auoir
Dung autre riche de terre & de manoir
Donner pour Dieu ne autre grant ſouldee
Face des biens ſeloy quelle eſt rentee
Du poure/Dieu agree le denier
Souuent pluſſfort que du riche Dng miſſier

C faiſons aumosne ſans nul ypocrisie
Donnons des biens ſeloy noſtre puiſſance
Secourons ceulx que fortune apourie
Ayons regard au leal qui mendie
La doit pitie faire ſa remonſtrance
Qui ſe de ſert ayez en congnoiſſance
Mais que Vertu ſoit cauſe du ſeruice
Ceſt don perdu qui eſt acquis par Vice

C Exemple de liberalite

Maintenant me vient en memoire ceſte tresVer-
tueuſe dame Chreſtienne de Piſain laqſſe noble
dame fut moult intelligente deuote en laſcien-
ce de rethorique cōpoſa pluſieurs beaulx & doctrinaulx
Volumes & entre les autres la cite des dames en laqſſe
cite elle ramentoit moult de dames Vertueuſes & renom-
mees & pour cōtinuer ma matiere ie dōray exemple pour
aprouuer la bource de liberalite & ſequel exemple iay

prins & tire du liure dessusdict & suis bien contēt de aler
quer les allegations de Crestienne de Pisain car ses
faitz valēt destre ramentuz & appuiez Dit Crestienne
q̄ au tēps que Paris florissoit en Vertueux epercite plus
sieurs foyz festes & assemblees ce faisoiet en Paris en
diuers lieux selō les festes nopces chappelles & autres
manieres acoustumez a faire festes & resiouissēmēs En
ce temps se tenoit a Paris Vne noble belle & Vertueuse
princesse cōtesse de Vādosme si bien renommee de toutes
Vert⁹ q̄ les pl⁹ nobles suinoient celle dāe cōe Vne epē
plaire de tout hōneur & de bien faitz & leur sembloit q̄
auecqs si noble & si Vertueuse dame ne pouoit q̄ bien ad
uenir En ce tēps se tenoit a Paris Vng ancien cheualier
bien renommee en son temps de Vaillance dhōneur & de
Vertu & se nommoit messire Animond de Pōmires beau
& honneste Vieillard/car il auoit plus de .lxx. ans daa
ge mais touteffois gracieux & dhōneste conuersatiō &
deuises Et sembloit a icelle contesse de Vandosme que la
cōpaignie de ce noble cheualier faisoit a reommāder &
aussi aux autres dames & le menoient a leurs bonnes
chieres & assemblees cōme Vng bon patron dhonneur &
de bon exemplaire Or aduit q̄ messire Animōd de Pō
mires eut Vng proces en parlemēt qui p̄dit & en fut
condāpnē Et n'auoit pas le bon cheualier desrobe la
guerre Mais auoit este hōme hōnorable sans penser au
prouffit dont il estoit beaucoup a pouri Et pour nantir
le adiuge qui montoit dix mille frās y fut mis en la
conciergerie prisonnier & ou tēps qui tenoit prisonnier

Vnes nopces ⁊ Vne moult grande feste se fist a Paris
dunq des officiers du Roy ou furent ladicte contesse
toutes les dames ⁊ gens de bien de Paris pries a celle
solempnité Et quant elle furent toutes assēblees en
Vne grāde salle la contesse de Vandosme demanda/pour
le cheualier messire Anymond de Pommires a laquelle
fut respōdu quil estoit prisonnier pour grāt debte La
dame estoit ce iour parée dunq riche chapel de perles ⁊
de pierreries sur ces cheueulx Qui moult bien luy scoit
Mais quāt elle ouyt l'emprisonnement du cheualier
considerant les seruices fais par luy au roy ⁊ au royaume
de France la bōne cheualiere dont il auoit renommee
⁊ l'anciennete de sō aage Elle mene de pitie ⁊ de liberalite
Vertu appellānt deuant tous quatre notables person-
naiges ⁊ osta le chappel dont elle estoit parée ⁊ le liura
a iceulx ⁊ leur dist allez en la conciergerie ⁊ mettez mon
chapel en depoz ⁊ en nātissēmēt pour les debtes de mes-
sire Animōd de Pommires ⁊ me amenez le noble cheua-
lier car il parera plus ceste feste que tout le demourāt
Et ainsi fut fait ⁊ pour ce parer fist faire Vnq chap-
peau de preuanche dōt elle aourna son chef sur ses che-
ueulx celle liberalite faicte discrettement ⁊ en saison
doubla sa beaute ⁊ augmenta sa Vertueuse renommee
Et Vous souuiengne madame ⁊ toutes qui liront ceste
epistre de liberalite de la contesse de Vandosme. ⁊c.

Dbles dames mettez memoire ⁊ cure
A retenir les habitz ⁊ les pompes
Que se donne a ma dame ⁊ procure
Qui vient a point de facon ⁊ mesure
A toutes femmes destat ⁊ lieu quelconques
Or nous conuient en persuerant doncques
Vng coustellet en villes ⁊ citez
Pour ayder femme en ses necessitez

Ec seay tresbien que princesse a cousteaulx
Pour la seruir pompeusement a table
Garniz dorez richement fais ⁊ beaulx
Manches armoyez aussi bien grans oyseaulx
Cest Vng seruice tresbonneste ⁊ notable
Mais ie trenue le cousteau prouffitabile
Que dame porte sur soy pour ce seruir
A tout besoing qui luy peult souuenir

Le cousteau pend a Vng cordon de soye
Le manche doulx l'alumelle ascerce
La guayne gente combien que peu se doye
Selon les dames il est cher de monnoye
Le cousteau sert bien souuent ⁊ agree
Dame ne porte ne dague ne espee
Et na glaine qui luy feroit offence
Que Vng coustellet de petite deffence

Et tonteffois fault que Vertu se tire

Du contelet dont la dame est parée
L'est iustice qui vault bien de lescrière
Car de iustice ne se peult trop bien dire
Justice vault estre hault esleeue
L'est le moyen pour estre separee
Toute dame qui celle Vertu garde
De tous les vices dont l'ennemy nous sarde

C Le manche doulx a trenchant asemblé
Alleust qui nous fera service
L'est a dire que douceur sans cautelle
Doit auoir dame cōme la torterelle
Sans quelque hayne sans rigueur & sans vice
Mais quant l'offence desire la iustice
Le tendre cuer doit en rigueur tourner
Et consentir de iustice ordonner

Justice tient le peuple en sa droicteure
Justice garde les pources des puissans
Justice tient raison en sa mesure
Elle deffend le loyal de torture
Elle rompt guerre debat discorde contens
Le toy qui lis iustice bien entens
Chacun de soy & de son propre fait
Doit raison faire qui veult estre parfait

Autant princesse que Vne simple bourgoise
Et Vne royne comme Vne bergiere

Celle a sur cueur tort d'autrui qui luy poise
De soy mesmes sans parolle & sans noise
Face iustice & la raison legiere
Du bien publicque eslieue la baniere
Le cueur le sens se doit la employer
Qui Veuist auoir des Vertus le soyer

C Justice & droit & Viure honnestement
Ne blesser ame son prochain ne autrui
Rendre a chascun le sien entierement
Viure en tous faitz tousiours si iustement
Et Vers chascun tout ainsi que Vers luy
Chacun congnoist ny a celle ou celui
Que par iustice est paye en chascun lieu
Dame iustice est Vraye fille de Dieu

C Exemple de iustice

Pur dōner exēple de iustice ie me pourroye
Arrester sur la saige Delbora laquelle ingea
en israel & nest point trouue q̄ les nobles saiz
ges ingemens selon Dieu & raison fussent faictz en israel
que fist celle noble dame Delbora/mais requiert de
monstrer & donner a entendre que iustice/ nest pas oeu
re seullement d'homme ou de femme mais est la main
de Dieu & sa pmissiō pour tenir les mauuais en crainte &
les bōs en seurte & dōnerōs exēple de lepecution q̄ fist
Judich du tirāt Holoferne q̄ de sa femeie main p̄ l'apmis

fiō de Dieu trēcha le chief et fist iustice de icelluy tirant
sur lequel di p mille hommes noserent entreprendre Je
treuve que Lambises eut Vng filz qui fut nomme As
suerus lequel fut roy des Assiriens apres son pere ces
tuy Assuer⁹ roy de egipte ⁊ de Babilōne fust esleue en or
queil ⁊ auarice ⁊ fist sommer ceulx de Damas de Lali
phe ⁊ autres prouinces qui luy rendissent les tribuz ⁊
grandes rāsons des deniers a quoy ses p̄decesseurs les
auoyent faitz tributaires ⁊ quant il vit les prouinces re
fusantes il commanda a Holoferne maistre de sa che
ualerie qui prist grant pouoir de gens darmes pour con
traindre lesdictz reffusans a acomplir sa Doulente sans
esparagner force Violence ne cruante ⁊ mieulx ne pouoit
employer ses cōmandemēs car Holoferne estoit Vng ti
rāt tout delibere de desrober ⁊ faire tort a tout le monde/
larron publique ⁊ manifeste ⁊ qui neyfaisoit cōte a Dieu
a droit ne a iustice ⁊ trouua prestement largement lar
rons ⁊ satallites car cōmuncement telz sont Varlez que
les maistres/mais Dieu le droiturier ⁊ iuste garde le
soyer tel quil appartient aulx mauuais obstinez ⁊ en
durcis en leurs Vices ⁊ permet ses iustes iustices estre
faictes par estranges Voyes a nous incongneues ius
ques a ce que nous voyons reallement lepecution de sa
diuine permission comme il appert du tirāt Holoferne
lequel ne sarresta pas seulement a commettre larrceins
efforcemens de femmes ⁊ telz grans oultrages: mais
Doulut abolir ⁊ estaindre le nō de Dieu ⁊ contraindre
ceulx qui cōqueroit a croire quil nestoit aultre Dieu que

soy maistre le roy de Babilone/dont il aduint que luy z
soy plus grant pouoir tenant le siege deuât Vne cite
nommee Bethulie dont Ozimas estoit prince z seigneur
tant oppressa ledit Holoferne ladicte cite de Bethulie
quil leur osta par puissance donouriers/les riuieres z les
caues dont le peuple generallyment tous les habitans
se trouuerent en moult grâde destresse de soif z estoit la
cite ou dangier destre prise z rendue Si aduint que Dieu
pour secourir se peuple contre cruaulte du tirant inspira
Vne noble dame nommee Iudich z luy permist hardie-
ment/doser entreprendre la Vengeance des mauſ y perpetrez
par ledit Holoferne z faire de ses mains iustice Vertueuse
Ceste Iudich fut la plus belle dame de son temps Elle
estoit Vertueuse seruant Dieu z gardant saintement sa
Defuete. Elle Voyant la cite ou elle estoit en tel peril
elle conceut le remede z conforta le peuple z les ehorta
de prier Dieu pour elle Et quilz eussent pacience z latten-
dissent par nuyt au y portes Et quelle feroit oeuvre de
Dieu Elle par nuyt acompaignee dune seruante ou elle
auoit fiance ce partit de la cite z descendit es tantes en
loſt de Holoferne z fut deuant luy amenee/z tantost quil
la Vit comme Vicien y il la connoita pour sa beaulte z
luy enquist la cause de sa Venue z elle Vsant de sens des-
libere/luy respondit que les dieu y disrael estoient cour-
rouceez contre eul y z pource doubtoit elle destre en la ci-
te/si la fist loger z traictier moult honnorablement.
Allez tost apres Holoferne fist Vng grant cōuine q nous
disons Vng banquet ou furent ses princes z autres en

grant nôbre a ce conuine beurent oultre mesure & sen y-
urerent & mesmes Holoferne qui de ce estoit coustumié/
& quant ilz furent separez & chascun retire en son pa-
uillon. Holoferne commēda a signer Vng sien escuyer
quil luy amenast Judich/celuy lalia querir & la ames-
na cuidant quelle deust faire la Doulente du tirant/
chascun se retira pour laisser la dame seulee avecques
luy & Holoferne qui estoit oppresse de trop boire & de Vin/
cestoit ia endormy & Dieu le Vouloit/car cest luy seul qui
conduit & mene loeuure de iustice avecques toutes bō-
nes executions & emprisez. Ceste dame deliberee de as-
frāchir la cite de sa mauuaitie pleie de foy & desesperance/
de layde de Dieu inspiree de faire iustice & Vengeance/a
Dieu & au mode des cruelles ocuures de ce tirāt print le
pee qui estoit a son cheuet non pas cōme fēme & en meurs
femenine/mais comme changee en courage & force dhom-
me/elle ne parla point doubtant esueiller ce tirant/
mais son cuer cryoit & prioit a Dieu aydez force de pe-
cuter iustice sur le malfacteur & haulce lespee trēchant
& couppa la teste doloferne/du seul cōp conduit ordonne
& mene de la main de Dieu La noble Judich auoit ames-
ne avec elle Vne sienne seruante nommee Abra laquelle
portoit Vng sac de cuir ou fut presentemēt mis le chief
de Holoferne/lespee fut remise en sa guaine & se ptirent
a diligēce la dāe & sa seruāte guideez & menez de Dieu
& de bōne fortune. Et quāt elles aproucherent la porte de
la cyte elles cryoient a haulte Voix ouurez la porte car
Dieu a ouure avecques nous & est avecques nous. Le

peuple y courut a grant luminaire/ & elle leur monstra
 le chief de leur persecuteur & leur dist que Dieu lauoit
 gardee de pecher & de perir & quilz le louassent & feissent
 mettre ce chief en Vne lance sur les murs/ affin que tous
 ses gens le peussent Voir ce que fut faict. Si tost que
 le iour apparut/ les chabellans doloferne cuidoiert quil
 dormist en son pauillon/ mais ilz le trouueret mort & des
 capite. Et puis Viret le chief sur les murailles de la Vil
 le/ dõt ilz furent tous si esbays & espantez qlz se leueret
 du siege & sen fuyrent en grāt desroy & desordre & ceulx
 de la cite les enchasseret q plusieurs en occirēt & dōneret a
 Judich toute la pecune doloferne pour sō loyer. & p ceste
 epeple no^r deuōs cōgnoistre q Dieu Vult faire iustice
 aussi bien par les femmes que par les hommes.

C La gorgerette de sobriete

Lha. viii.

A Lors plus hault affin q riens ne celle
 A madame fault Vne gorgerette
 Pour luy courrir le col & la forceille
 Le beau tetin la chair fresche & nouuelle
 La se peut Voir Vne beaulte parfaicte
 La toille doit estre fine & bien faicte
 De doulx fillez aussi bon que de soye
 Affin que loeil sans descourrir le Voyer

C La gorgerette de toille bien sortie
 Garde la chair de hasse & noirciture

La gorgerette/habitue la partie
Honnestement affin quoy ne mesdie
De trop monstrier ce qui doit couuerture
De peu a trop il doit auoir mesure
Et conseilse toutes dames de pris
De moyenner lestat de ses habitz

La gorgerette seruant a ma maistresse
Je la iuge quoy la nomme ⁊ appelle
En office la Vertu de sobresse
Ceste Vertu vous fera garderresse
De Vostre corps affin que ne chancelle
Le corps soulle souuent Vice lappelle
Vice se nomme dangerenx messager
Qui maine gens a honte de leger

Nas ne souffrit que sobresse nous serue
Pour nostre chair abaisser ⁊ matter
Mais fault la langue a legerette serue
Tenir si sobre que riens ne nous asserue
A trop parler qui peut beaucoup conster
Ainsi sobresse seruira sans cesser
A soy garder de Vie dangereuse
Et la langue destre trop perilleuse

Ainsi comment la gorgerette garde
La chair tresblâche dempirer ou mal mettre
Sobresse pzent en conduicte ⁊ en garde

La chair fragille affin quelle ne perde
Par trop nourrir ⁊ en pechie se mettre
Sobre parler est de bon sens le maistre
Ainsi sobresse est mere de sante
Sobresse vault quelle ait auctorite

Soyons sobres ⁊ fuyons gloutonnie
Qui des peches est affectant nourrice
Sobresse fait sante ⁊ longue vie
Gourmandise paresse l'endormie
Cest la fontaine ⁊ la source de vice
La sobresse est moult au y dames propices
De sobresse faictes en ung mestier
Elle est si bonne quelle vous a mestier

Sobres soyons de mengier ⁊ de boire
Soyons sobres de parler ⁊ respondre
Gourmandise vault pis que le tonnoirre
Trop parler nuyt plus qu'on ne le peut croire
Lathon le dit ⁊ nous en veult semondre
Et deuroit on comme fol celui tondre
Qui ne compasse sa langue saigement
Dont tant de maulx aduiennent longuement

Exemple de sobriete.

O temps de l'epereur Dallai qui fut de l'here-
rie Arriane homme mauuais ⁊ psecuteur de chres-
tiens ung homme fut moult bon ⁊ deuot catholice

que ⁊ se nōmoit Estiēne Lo:fenin cestuy Estienne fut
Deuf ⁊ auoit Vne seule fille nōmee Marine moult
biē moriginee ⁊ apriue de lettre en sa ieunesse ⁊ de di-
uins enseignemēs cestuy Estiēne sō pere se delibera des-
tre religieus ⁊ moine ⁊ de mener Vie contemplatine/ ⁊
denote ⁊ laissa Marine sa fille a Vng sien parent ou il
auoit fiāce/ ledit Estiēne fut receu moine de saiet Be-
noist ⁊ moult ayue de son abbe ⁊ cōuēt: pour la sainte
Vie quil menoit: mais il se monstroit moult pēsif ⁊ me-
lēcōlieus ⁊ dēt labbe sapceut de sa tristece ⁊ luy demā-
da moult charitablemēt q̄l luy faillloit en luy offrāt cō-
seil ⁊ ayde a sō pouoir le preudhōme luy dist quil estoit
en melencolie de ce q̄l auoit laisse Vng seul filz au mōde
lequel il Vouloit biē auoir pour en faire Vng reli-
gieus ⁊ quil peust auoir shabit de scās labbe q̄ moult
aimoit frere Estienne: luy accorda de Vestir son filz ⁊
quil se allast q̄rir Si traueilla tant le preudhōe Estiē-
ne qui Vint la ou estoit sa fille car le monastere ou il se
rēdit estoit loing du pays dōt il estoit ne ⁊ hors de la
congnouissance de ses amys il demanda secretement a
Marine sa fille se elle Vouloit entrer en religion: elle
dist que ouy ⁊ que cestoit son plus grant desir: dont le
pere loua nostre seigneur ⁊ conclurēt de leur partement:
⁊ de ce q̄l Vouloit faire ⁊ fut Marine qui pouoit auoir
quatorze ans habillee en habit dhomme ⁊ tant fist le bon
homme quil amena Marine comme son filz pour la bail-
ler: ⁊ le presenter a labbe qui le receut benigneēt: fut re-
uestu en la religiō ⁊ fut nomme frere Mari ⁊ se rēdit tout

humble & obeïssât & tât deuot q̄ riēs pl⁹ il ap^rit songueu-
seint: tout ce q̄ religieus doit ap^rēdre & tenoit si bōne
maiere q̄ on ne se fust iamaes ap^reu q̄ ce fust Vne sēme:
dōt sō pe auoit grāt ioye de sa bōne Vie frere Mari estoit
si sobre que quant les autres religieus se passoient dūg
oeuf il se contentoit dūne pomme & quant ses compai-
gnons se sustentoïēt dūne pomme il se contentoit de la
pleure/silz buuoient Vin il prenoit pour luy citre ou ser-
noise/& silz auoient sernoise il se contentoit deaue seulz
lement/sa sobresse de boire & de menger fut si austere
quelle nest a nulle autre a comparer son pere mourut &
frere Mari fust moult grande diligence & deuoir pour
prier pour lame de son pere. Aduint que le pere abbe fai-
soit refaire le dortoir de son abaye/& conuenoit que les
religieus couchassent dehors le cloistre & en la Ville a
l'hostel dūg noble bourgeois grāt amy de labbe iusques
ledit dortoir fut refaict. Celuy bourgeois auoit Vne fille
qui fut grosse dūg sien seruiteur & acoucha dūne fille/
dont elle fut moult mal menee du pere & de ses parens
& nosoit dire qui estoit le pere de lenfant/carelle aymoit
& doubtoit qui ne fust eslongne d'elle/& pource quelle vit
que frere Mari estoit simple & bon ieune moyne de
p^{vii}.ans/elle dist que frere Mari lauoit decene & luy
auoit fait cest enfant/& fut ledit enfant ap^rorte a labbe
& fait la plainte contre frere Mari qui fut moult re-
pris & corrige de labe & du couuent/luy fut baillē len-
fant & condempne de le nourrir & fut chassē hors de lab-
baye & forclos de sa p^rēde & tousiours disoit Dieu soit

loue de tout se iay peche il me Ducille p'donner & en fe-
ray Douletiers la penitâce/il fut si sobre de parler q'onez
q's il ne Doullut dire sil auoit fait peche ou non/& ce pour
deuy raisons dôt la sobresse fut fonde & aima mieulx
endurer & ouir reproche que parler cōtre sa Doulète & lu-
ne des raisons fut qui ne Doullut oncques soy excuser de
la charge q'oy luy dōnoit quoy q'ce fust sans cause pour
doubte q'l ne fust scēu que c'estoit Vne femme & q'l ne cō-
uint pl' habandonast le lieu de sa religiō l'autre raison
il aimoit mieulx porter la hôte du mōde q'la mere de lē-
fant portast pugnition de son abuz & la fut bôte sur bôte
& double Vertu charitable frere Marin nourrit elle &
lēfant d'ammēne & Desquit hors de l'abbaye moult pou-
rent l'espace de trois âs & tāt q'les freres en eurent pitie
& requirēt qui peust rentrer en l'abbaye/l'abbē le cōsentit
pourueu q'l nestiroit & mōderoit a la peie de ses bras to⁹
les retrez & priuez de l'abbaye ce q'l fist & porta leane sur
son col & de sa personne pour faire en grāt obeissance &
porta la penitance sās auoir fait le peche Aduit q'Vne
maladie print a frere Marin dôt il mourut en Vne pe-
tite maisō de celle abbaye les religiēx y allerēt pour
l'ensepueir & mettre en terre & trouuerēt q'frere Marin
estoit Vne fēme coururēt a le² q'abe fut de ce mōlt esmer-
ueille & desplaisāt pour la hôte & sās cause q'luy estoit
faicte la mere de lēfant cōfessa la Verite & descharcea
frere Marin qui depuis fut nomēe Marine cōe deuāt el-
le reprit son enfant. Le corps de la saicte Vierge marine
fut ensepulture en l'adite abbaye deuant le grant autel

en grāt deuotion ⁊ fist depuys la noble Vierge Marine
de beaulx miracles ⁊ mesmes de la damoysele son ac-
cuseresse qui fut chassée de l'enemy ⁊ cōme enragée Vint
cōgnoistre son peche cōme dit est ⁊ la glorieuse saīte Ma-
rine luy dōna guarison O nobles dames pnez exēple a
la saictete ⁊ sobresse de ceste saīte Vierge Marine car
moult de mauulx peuent aduenir par la gloutonnie de la
bouche ⁊ par la legierete de la langue ainsi quil appert.

¶ La bague de foy

Chap. viiii.

Antinuons es pompes que ie forge
Parons ma dāc dune bague tresdigne
Qui luy pendra au col ⁊ a la gorge
Vaulant dix mille de ducas que l'on forge
Dung dyament des meilleurs qui se fine
Qui soit naif ⁊ de la bonne myne
Taillez a face par si bonne maniere
Qu'on ne sache laquelle est la premiere

¶ Le dyamant naif par sa bonte
On ne le peult ne rompre namentir
Le dyamant a de propriete
Que qui le porte cest comme Vne seurte
Et ne peult on le froisser ne perir
On ne le peult trop baillant acquerir
Heraulx le prisent blasonnant les escus
Sur les couleurs les metaulx ⁊ Vertus

C Les lapidaires en riches pierreries
Du dyamant font grant pris & estime
Si ne seront les grans Valents peries
Par mes escriptz mais plussfort anoblies
Comme pierre de Vertu noble & digne
Dus les Vertus ie luy donne & assigne
Pour mieulx parer la princesse de moy
Se noble tiltre que loy appelle foy

C Foy est lensegne la guide & le chemin
Pour paruenir en la gloire parfaicte
Sans foy ne peult errer le pelerin
Pour paruenir au port de bonne fin
Sans ferme foy toute oeuvre est imparfaicte
Foy est de croire Marie pure & nette
Que l'escripture appelle toute belle
Que Dieu conceut & l'enfanta pucelle

C Foy est de croire la sainte trinite
Trois personnes ou na diuision
Dieu le pere est la source de bonte
Le filz piteulx qui nous a rachete
Soy faisant homme pour souffrir passion
Saint esprit cest paix & Union
Qui l'homme a Dieu tient en beguinolence
Et sont ces troys Vng Dieu & Vne essence

C Grant foy deuone ou digne sacrement

Que nous voyons entre les mains du prestre
Quant par Vertu du saint consacremēt
Dieu seuffre a luy ioindre pain de froment
Du il se donne pour ses enfans repaistre
En ceste foy deuons mourir ⁊ estre
Foy est l'esperoir qui nous deliure ⁊ donne
Pour paruenir la ou la fin couronne

CLa foy deuons a nostre mere leglise
Et obeir a ses commandemens
Au Pape croire qui sur nous a maistrise
Foy maintenir la ou foy est promise
Foy est l'escolle de Vrays enseignemens
Foy est le lustre de tous les paremens
Cela gardez madame redoubtee
Vous en serez en triumphe augmentee

CLe dyamant qui est dur non comparable
Nous de monstre la foy pour estre telle
Quelle ne soit ployant ne corrompable
Mais toute ferme sans estre variable
Et fust pour perdre ceste Vie mortelle
Lar qui en foy se fouruoie ⁊ chancelle
Destre perdu la se monstre le signe
Sil na secours de la grace diuine

CExemple de foy

Digne seur & Vray exemple Vo^r pourray dô-
ner & mettre de la glorieuse mere de Dieu la
sacree Vierge Marie pour le pemp^e de foy
car toutes les escriptures dient & tesmoignent que a la
mort & passion de nostre redẽpteur Jhũcrist toute la foy
fut oubliẽe faillie & esteinte fors ce qũle demoura seule-
mẽt en la glorieuse Vierge Marie mere/ & delle & par elle
fut toute la crestiẽte rẽluminee de foy mais pource q̃ sa
inestimable sainctete nous est trop grant & admirable
exẽple ie pleray en cest endroit dautre Vertueuse psonne
a nous plus semblable qui fut pseuerãt en foy cõme il
sensuit. .xc. Je treuve au Viii. chap du second liure des
Machabees q̃ ou tẽps que le Roy Anthiocus payẽ prist
la cite de Jherusalem il fist moult de mauſy & de pseu-
sions au peuple crestiẽ psuadãt de leur faire laisser & ha-
bãdõner la foy & la loy crestiẽne & cõttraindoit a soy po-
voir les enfãs de Dieu a adorer les idoles ou les faisoit
mourrir en crueny & diuers martires & entre les aultres
Il aduint quil fist prendre sept freres De la realle li-
gnie des Machabees et avec iceulx fut prinse leur mere
Vne moult vaillãt & saincte dãm noble de meurs & de
realle natiuite ceste dame se nõmoit Anne de la Roche
ferme & constante en la foy de Jhesucrist les dessusditz
sept freres furẽt amenez deuant Anthiocus pour adorer
les ydoles & dũq accord p̃ la bouche de laisne des freres
il dit a Anthioc⁹ couragement Roy que Veuſy tu
faire de nous ou que nous demãde tu no^r sõmes plus-
tost appareillez de mourir q̃ de consentir la foy & loy de

noz pères & perens estre chāce enfrainte ne Viollee Les
luy Roy de grāt pze & mal tallent fist a laisne qui pze
mier auoit parle trecher la langue escorcher la teste
coupper les piez & les mains en la p̄sence de la mere &
des auts freres & puis le fist metre en Vne grande paes-
se de fer toute ardente les Vngz apres les autres fist
mourir en cest tourmāt & eulx estāt en ce cruel martire
la noble mere plaine de foy & de deuot courage enhortoit
ses enfans de mourir fermes & constā en la sainte foy
crestiēne & leur disoit mes enfans souffrez deuotemēt &
de bon cue^r Vne heure de tourment & de peine pour auoir
la ppertuelle ioye qui iamais ne fauldra & en ceste foy
continua de rencourager ces sept enfans les Vngs apres
les autres & le tirāt persuadoit le septiesme frere qui
estoit le plus ieune & Vouloit quil reniaast la foy en luy
promettant grans biens & gouuernement mais la sainte
dame despitant la mort & le pouoir du tirant plaine
de diuine esperāce en la p̄sence du roy Anthiocus disoit
a son filz mon enfāt tu as Deu avec moy tes freres mou-
rir & martirer fermes en la foy de Jesucrist ie suis ta
mere qui te assure q̄ leurs ames sōt en paradis demeu-
re dōc constāt & ferme Voluntairement en la sainte foy &
foy de tes parens & ie te prometz q̄ ie mouray en ceste
oppinion ie requiers Jesucrist & sa sainte mere Marie
qui te gardēt & maintiennent en ferme foy lors le ti-
rant plain de despit fist lēfant martirer & mourir deuāt
la mere & puis la mere apres les enfans Laquelle ioy-
eusemēt endura le tourmēt & receut courōne de martir

re/car elle mourut plaine de foy Et pource mes dames
qui ceste exēple lisez ⁊ regardez ressemblōs Anne de la
Roche ⁊ demourons en foy sans Varier car par la foy
nous pouons escheller le ciel ⁊ gaigner paradis

CLa robe de beau maintien

Chap. vñ.

PDur mien y parer se corps debout écor
En seur propres Vertu ⁊ bonne guise
Robe nous fault qui sera de drap dor
De couleur pourpre ⁊ qui Vaille Vng tresor
Tout le meilleur de Chippre ou de Venise
A la grant gorge comme Vne chose exquisite
Et richement soit dermines fourree
Princesse Vault de y estre bien parée

CLocil s'esioit a Veoir lor resplandir
Chacun se mire chacun y prent plaisance
Les regardans ont soulas ⁊ plaisir
De Veoir parure a leur choiz ⁊ plesir
Et ne leur touche sinon le regard en ce
Dz fault tirer Vertueuse apparence
De cest habit que ie baptise en bien
Pour la nommer robe de beau maintien

CToutes dames sauourez ce couplet
De beau maintien soyez en aournées
Car comme lor a locil agree ⁊ plaist

Maintien de femme ou il plaist ou desplaist
Sur le maintien sont les notes fondees
Par fol maintien plusieurs ont renommees
Asses souuent qui approche diffame
Et sans peche de lhonneur ⁊ de lame

C Vous ieunes filles qui desires honneur
Laissez la lettre tout ouurage ⁊ escolle
Se beau maintien qui tant est de valeur
Aprenez le ⁊ le faictes de cuer
Pour auoir loz qui leger court ⁊ volle
Car ce iuge descript ⁊ de parolle
Qui nest au monde tel tresor ne cheuance
Meilleur pour femme que bonne contenance

C Ainsi ma dame aura la riche robe
De beau maintien Dieu la luy entretienne
Et luy permette que nulz ne la desrobe
Cest Vng tresor pour mettre en garde robe
De la Vestir souuent bien luy souuiengne
La fourrure bien la garde ⁊ maintienne
Qui est darmines monstrant magnificence
Qui signifie Vertu dobeissance

C Le beau maintien obeissance prompte
Cest le moyen qui plus lhomme contente
Ce sont Vertus qui le plus fier cuer dompte
Jamais naura ne Vergongne ne honte

Qui ces deux poins maintient en bonne entente
Ma princesse ne soyez mal contente
L'amour de Vous me fait cy traueïller
A toutes femmes loyalement conseiller

Exemple de beau maintien.

Atre les roys qui regnerent en Judée regna
Assuere tant sur le royaume de Judée cōme
sur Ethiope il fut Roy puissāt il eut pour sa
principalle fēme ⁊ espouse Jeshō leur loy Vne dame de
noble lignee nōmee Vasti Se Roy Assuere tint Vne
grande feste avec ses princes ses nobles ⁊ subgetz en la
cite de Scissis qui estoit le lieu de son principal siege Et
dit la bible que ceste feste se fist en Vn iardin grāt ⁊
spacieux que lon nommoit le iardin de delices/ ⁊ daultre
part tenoit la Roynie Vasti grant estat ⁊ triumphe a
uecques les princesses ⁊ dames de son royaume Le Roy
desira de Veoir sa femme ⁊ luy manda q̃lle Vint deuers
luy ce quelle reffusa par plusieurs fois/ le Roy se mes-
contenta ⁊ mist ceste desobeïssāce en conseil de ses prin-
ces ⁊ demurerent tous en oppinion que elle deuoit estre
delaissee habandonnee ⁊ expulsee du Roy ⁊ quil en deu-
roit prendre Vne autre car selon leur loy femme qui de-
sobeyt a son mary il la peult deïecter de luy ⁊ ne merite
point dauoir lamour de son seigneur/ ⁊ ainsi par desobeïssance fut Vasti expulsee ⁊ plus ne peult Venir de-
uer le Roy Assuere/ ⁊ pour recouurer femmes a son desir

fist assembler les plus belles pucelles de son royaume pour Voir & choisir a son plaisir & gre. Entre lesquelles fut Hester Vne pucelle de Judée & non pas de si grant lieu comme fut Vasti/mais son maintien & belle contenance passa la beaulte de toutes les autres pour: quoy le Roy la choisit & fut sa femme tresaymee. Et aduint que Aman qui fut principal gouverneur du Roy & qui moult hayoit la naciō de Judée par subtil moyen praticanua que le Roy Assuere son maistre/fist Vng bannissement a lencontre de tous les Juifz & prina la nation de sa presence sur peine de mort/& pretendoit Aman de faire exiller la Royne Hester & mourir Mardocheus son oncle. Soubz Vmbre quil estoit Juif & fut tresloinguent Hester sans oser Venir en la presence de son seigneur Et aduint Vng iour que le Roy estoit apuye a Vne fenestre/& la Royne Hester en riche parure/& beau maintien passa par deuant le Roy en grant humilite crainte & paour/le Roy lappella & elle Vint & obeyt moult douteusement. Assuere lattocha de sa Verge en signe damour & dassurance. Et elle dist monseigneur/nas tu souuenance que tu as fait edict pour faire mourir ou dechasser tous les Juifz Et que ie suis de celie nation & crains ta fureur & la mort. Assuere qui la vit si belle obeissante & de beau maintien luy dist. Ma mye iay faict ledit pour tous & pour toutes. Mais Vous estes la par dessus les autres. Et depuis celle belle parolle a este dicte en la sainte escripture pour la benoiste glorieuse Vierge Marie & Vrayement bien se peut nommer & dire

estre les femmes la par dessus les autres. Hester depuis
 se gouverna si biẽz si saigement avec le Roy son seigneur
 quelle rapaisa sa fureur contre les Juifz ⁊ tourna son
 mal talẽt sur Amay / inuenteur ⁊ conduiseur de la des-
 truction de la nation de Judce / ⁊ dont il fut pendu aĩsi
 la royne Hester par son obeissance gaigna le lieu real
 que perdit Dasti p sa faulte / ⁊ par beau maintien pleut
 au Roy son mary / dõt elle saulua son pays ses parẽs ⁊ sa
 lignee de perdition. Mes dames icy a bel eẽxemple tant
 en obeissance comme en beau maintien ressemblez donc-
 ques la bõne Royne Hester ⁊ Doz besongnes en vauld rõt
 de mieulx ainsi comme pourrez congnoistre.

¶ La ceinture de deuote memoire.

Chap. vdi.

A Nq or seure nous conuient recouurer
 Qui nous saiche faire Vne cordeliere
 Du pl^r fin or que son pourra trouuer
 Esmaillee de blanc noir rouge eler
 Pour a ma dame faire ceinture chere
 Des patenostres pour faire la maniere
 Pendront deuant de fin blanc cassidoine
 Le temps present le dit ainsi ydoine

¶ Ainsi le point qui clost du corps shabit
 Cest la ceinture dont dame se doit ceindre
 La ceinture la personne embellit
 Cest la parure qui plus fort anoblit

Elle est seant au grant ⁊ au maindre
A quel Vertu la ferons nous attaindre
Qui soit seruant a ce cas ⁊ notoire
Cest la ceinture de deuote memoire

CLe corps pare tout cloz par la ceinture
Dame ce point bien entende ⁊ se notte
Car on ne peut oster quelque Vesture
Jusques le ceingt en face deffermure
Tant soit de robe de chemise ou de cotte
Et ainsi garde la memoire deuotte
Que les Vertus ne se separeront
Du digne cuer ou trouuees serent

CLe cuer qui tourne en deuote pensee
Si ne peult cheoir es latz de lennemy
La memoire qui en bien est tournee
Est tost de Dieu tellement confermee
Que lame sent paradis a demy
Qui de Dieu fait son souuerain amy
Celle peut dire certes ie suis aymee
Du plus leal qui soit en la contree

Memoire fait reuoir le temps passe
Et souuent des maulx ⁊ des biens faitz
Vng cuer deuot ne peut estre lasse
De cogiter tout ce quil a brasse
Soit bien soit mal auilmosnes ou toz faitz

Lar la se poissent les fardeauz & les faitz
La conscience se peut la regarder
Cest le moyen pour sa Vie amender

C Noble ceinture riche dor & desmail
Je treuve cy pour ma dame seruir
Memoire tient des Vertus le fermail
Le cueur deuot est tousiours sans sommeil
Pour Veiller lame & garder de perir
Ma maistresse a qui Dueil obeir
Se meillieur don en ce monde trouuoie
Dieu mest tesmoing que ie le Vous donroye

C Exemple de deuote memoire.

I l na pas gueres de tēps q̄ ie ouys Vng gra-
cieux conte au propos d̄ deuote memoire & suis
delibere de le coucher p̄senteint pour exemple
d̄ l'aduertissement / de toutes dames & de celles qui ce p̄-
sent Volume lyront. Et treuve que au royaume de Na-
ples eut iadis Vne ieune dame princesse de Salerne nommee
Jouuelle. Icele princesse se trouua en ses ieunes iours
seulle heritiere grāt dame & riche & du nōbre des princes-
ses du Royaume / du sang & parente du Roy de Naples /
belle entre les belles / & deuez scauoir q̄ elle fut requise de
plusieurs princes & grans seigneurs pour l'auoir a fem-
me & espouse / mais elle ne choisit pas legieremēt pource
que femmes sont fort subgettes & tenues courtes en iceluy

Royaume/mais ayuant ses plaisâces ⁊ pleine de ieunesse fuyoit destre subgette d'austruy ⁊ passoit ses ieunes iours a faire grans assemblees ⁊ festiemes bancquetz dances ⁊ ioyeusetes/ ⁊ a la Verite estoit pl⁹ esleuee ⁊ plaine de ieunesse quil n'apartenoit a son aage ⁊ dont on parloit en plusieurs lieux plus quil ne fut besoing: car quant femmes se desfriglet: il est tost tourne ⁊ mis en mauuaise notte. Ceste princesse de Salerne ainsi pleine de Doulentaire ieunesse: toutesfois auoit Vne deuote memoire ⁊ Vne coustume ⁊ facon de seruir Dieu ⁊ ouyrmesse tresdeuotement ⁊ en simple habit Vng grant coeuurechief sur son atour luy couuroit la face ⁊ se mussoit en Vng coing de leglise ⁊ durant le diuin seruice se maintenoit coustumieremet ⁊ obseruoit ceste deuote memoire le matin du iour sans faillir et le surplus de la iournee estoit employee par le contraire de toutes Vanitez mondaines ⁊ n'estoit pas le iour continue en Vne maniere de Viure: mais bien contraire lune a l'autre. Aduint Vne fois que ceste princesse de Salerne: auoit faict grant festiement aux seigneurs ⁊ dames du pays. Et fut celle assemblee en grât nombre de noblesse ⁊ fist preparer la plusgrant salle de son hostel moult pompeusement De tapisseries ⁊ de riches buffetz en grant habondance de Vaisselle. Les tables et la suyte richement estoffees. Et lassiete faicte des seigneurs ⁊ des dames des seruices des metz ⁊ entremetz ⁊ plusieurs autres bonnes sortes de Viâdes en grât foison ⁊ bien ordônez y poeras ⁊ diuers Vis y furent seruiz en grât hôneur ⁊ fut

celuy soup de grans fretz ⁊ despens excessifz/la iouerent
iueurs de diuers instrumēs ⁊ sonnoiet coꝛs ⁊ trompet-
tes que loy ne oyoit lūg l'autre parler/ ⁊ ap̃s les tables
leuees ⁊ graces dictes se commencerēt les dāces deco-
rees de grant luminaire de mōmeries ⁊ de chansons ou
chascun faisoit son miculx de se monstꝛer/ladicte prin-
cesse de Salerne rendoit toute peine de bien fringuer ⁊
ētretenir seigneurs ⁊ dames ⁊ la noblesse a leur conten-
temēt/ ⁊ certes elle employa celluy iour ⁊ la pluspart de
la nuyt au seruice du monde/de dame oysseuse ⁊ de temps
perdu ⁊ toutesfoiꝛs fallut la compaignie ap̃res auoir eu
le Vin ⁊ les espices pour le dernier metz/pour lyssue ⁊
conge/que la noble dame demourast avec ses femmes ⁊
familles/ ⁊ est a entēdre quelle se coucha tart/ ⁊ pour
p̃ēdre petit de repos/car la nuyt estoit fort auāceē auant
le depart des inuitez. Et pour moy compte acheuer ⁊
parfaire l'endemain se leua tart ⁊ se partit de la chābre
pour aller a la messe/ ⁊ noublia pas sa deuote memoire
acoustumee/mais couurit son chief hūblement ⁊ print
son chemin pour aller en la chapelle de son hostel ⁊ fal-
lut q̃lle passast par la salle ou auoit este fait ce riche
banquet/ ⁊ celle haulte seignourieuse feste. Et ce lieu
que le soir de deuant ressembloit Vng triumphe. Et
maintenāt ⁊ en si peu de tēps estoit si desole/les tables
abbatues dūng couste les bancs ⁊ les tresteauꝝ rēuer-
sez parmy la salle les os sepparez de la chair p̃my la
place ou les chiens les rongeoiet ⁊ y prenoiet leur refec-
tion Et pour cōclusiō cestoit abhominatiō de celie plas-

ce qui le soir deuant ressembloit Vnq lieu desdie pour touz
te plaisance ⁊ delices/celle princeesse se arresta pour mieulx
Deoir ⁊ incorporer celle merueille ou son entendemēt fut
lozs empesche ⁊ luy sembla ce lieu estre le monde en son
estre leql au cōmencemēt ⁊ a la sēte de iunesse est plai-
sant ⁊ si pōpeulx ⁊ tāt agreable q̄ ce semble plaisance
imortelle ⁊ durable prosperite ⁊ soudainemēt par ad-
uersite Veillesse ou maladie tout est rēuerse ⁊ mis en
ruine ⁊ p̄dicion qui tourne espoir en abuz plaisir en dou-
leur fiance en desespoir/ ⁊ est a croire que ce bon Dieu qui
tousiours de sa grace a ses fillets tendez pour prendre le
pecheur au poit de son prouffit souuent de la deuote me-
moire que nō obstant ses obstinces mondanitez elle a-
uoit tousiours durant le diuin seruice ce bon Dieu la
frapa au cuer ⁊ luy changea les meurs de perdition en
deliberatiō salutaire ⁊ durant la messe quelle oyt deuot-
emet ⁊ en effusion de larmes manda son cōfesseur se de-
libera dhabandonner le monde ⁊ dedās le tiers iour en-
suyuāt se rendit en religion fermee ⁊ de seurs de sainte
Claire en despitant le monde ⁊ ses abusions ⁊ en celle
religion fut ⁊ Desquit saintement le demourant de ses
iours ressemblons a la princeesse de Salerne laquelle par
les mōdanitez auoit Vne deuotte memoire parquoy Dieu
la rappella Affin aussi que Dieu nous reclame ⁊ ap-
pelle plus legierement a la parfaicte felicite.

Ag gâtier fault qui no⁹ face des gans
Bons & propices pour ma dâe ganter
Les gâs seruent en puer & doux temps
Les belles mains plaisent a toutes gens
Les gâs se doiuent songneusement porter
Les mains se doiuent tousiours nettes monstrec
Les gantz seruent souuent en ce mestier
Gardez les bien Vous en auez mestier

Pour cuir auoir yraye en Allemaigne
Pour ses beaulx gantz acheuer & parfaire
Du se mieulx sert cuir Venant de Champagne
Tout ce ne vault nous irons en Espagne
La pourrons nous assouir nostre affaire
Le cuir est doux & la Viollette flere
Ainsi ma dame & ma trefredoubtee
De cuir despaigne Vous en ferez gantee

Ses nobles gantz pour y mettre bonte
Quelle Vertu leur sera departie
Nous en ferons labeur de charite
Cest la Vertu que Dieu a apporte
En rachetant ceste humaine lignie
Par charite voulut prendre la Vie
Le doux Iesus pour lamour des humains
Lcharite se doit monstrec a deux mains

Lcharite est le feu & le tison

Qui brusle cueurs en Vertueulx effect
Charite est sante ⁊ garison
Laquelle efface peche ⁊ mesprison
Sans charite tout bien est imparfait
Donner pour Dieu est semblant contrefait
Se charite laumosne ne presente
Or notez bien ceste lection presente

Comme les gantz font a la main blancheur
Et les gardent de froit ⁊ de hassure
Charite vault pour tenir en Vigueur
Lame le corps sentendement le cueur
Contre peche car Vice est leur blessure
Cueur charitable en Vertu croist ⁊ dure
Saint Augustin la nomme toute bonne
Par charite Dieu nos meffaitz pardonne

Cobles princesse qui regente ⁊ domine
Et toutes femmes soit grande soit petite
Entre Vertus cueiller pour fleur diuine
La charite ⁊ plantez la racine
En vostre cueur comme Vne chose eslite
Cest la Vertu qui sert ⁊ qui prouffite
Dieu si adioinct les anges la conuoient
Pour la meilleur des grans Vertus quil ayent

Charite a telle propiete
Lis saint Hierosme il le te approuuera

Cest que le iour que l'on fait charite
Le que on requiert il sera accepte
Demande a Dieu ⁊ il le te donra
La charite en guerdon doublera
Dieu la recoit si agreablement
Que cest le fruit de nostre sauvement

C Exemple de charite.

DE cest article fonde de charite doibuent estre
les deux mains de nobles dames gâtees ⁊ a
ceste cause iay fonde mô fait en deux exem-
ples ⁊ assez dunc mesme cause ⁊ dôt le premier est aproue
par legende de saictz ⁊ lautre est apocrisse touteffois pris
⁊ extraicte es âciènes histoires ⁊ quât au p̄mier ie treuz
ue dūc saite martiree en flādes nōmee Godeliene la-
q̄lle fut en sō tēps moult noble fēme ⁊ fut si charitable q̄
tout ce quelle pouoit trouuer des biens de son pere elle
dōnoit incontinant tout pour Dieu ⁊ le portoit aux
poures dôt elle fut aucunement reprise ⁊ redarguee ⁊ luy fut
deffendu eppressement q̄ elle ne donnast plus riens Et
se prenoit garde le maistre dhostel d son pere sus elle
tressongneusement ⁊ Une fois elle auoit prins en la cui-
sine porcion du disner de sō pere ⁊ lauoit mis ⁊ enuelope
en la troussoire de sa robbe pour le porter aux poures dôt
ledit maistre dhostel saperceut ⁊ luy dist quesse que
vous portez serez vous tousiours larronnesse des biens
de vostre pere Dont lors Godeliene fut surprinse ⁊ es-

bashe & se recommanda a nostre seigneur & respondit
certes mon amy se sont buschettes & rabotures de bois q
ie porte aux pources pour eulx chauffer & ouurit son gi
rô & par la grace de Dieu le maistre dhostel ne dit q
menu bois comme elle luy auoit dit dont il fut moult
esbahy & confus & cōgneut biē que sa charite estoit a
Dieu agreable elle parfist son chemin & fist son aumos
ne & les buschettes quelle auoit monstre au maistre
dhostel nostre seigneur les reconuertit en Viādes com
me denant & de la en auant pouoit donner aumosnes a
son bon plaisir & depuis aduit q le conte de Boulogne
denoit disner alhostel du pere Godeliene & fut fait grant
appareil po^r le receuoir Godeliene q auoit le cue^r a
Dieu & aux pources ne se oublia pas mais de la Viāde
aprestee destoba le plus friant & le meilleur & en fist
disner les pources charitablement dont le maistre dhos
tel se trouua merueilleusement perturbe/pource que le
disner estoit deshōnore & ny auoit demeure que la plus
rude Viāde dont la menassa & aussi fist son pere de la
batre & lappella folle & ypocrite & quelle le Vouloit des
honorer & ne se scauroit amender La bonne sainte fille
se retira plourant en sa chambre en grāt regret dauoir
son pere ainsi courrouce se mist a genoulx & fist sa re
queste a nostre seigneur quil Voulsist contenter & ap
paier sō pere enuers elle Et en ce mouuement le maistre
dhostel retourna en la cuy sine & trouua les chaudieres
les potz & les hastiers tous plains par la grace de Dieu
tout puissant/& de toutes especialles Viādes plus que

deuât ⁊ congneut bien que nostre seigneur Ihesucrist
y auoit mys sa tresdigne main ⁊ que Godeliene estoit
amye de Dieu. Si fist seoir les seigneurs qui ne furent
oncques mieulx serui⁹ ⁊ depuis Godeliene fut mariee a
Berthoul seigneur de Guistelle en Flāndres qui fut
homme cruel ⁊ mauuais ⁊ la fist martiriser ⁊ mourir ⁊
lors fist ⁊ fait encores de moult beaulx ⁊ merueilleux
miracles au lieu de Guistelle / la ou elle est canonisee
pour sainte ⁊ par sa legende se nomme ma dame sainte
Godeliene de laquelle ie recite presentemēt aucuns
poinctz de sa sainte Vie pour approuuer que Dieu a
moult agreable / la Vertu de charite Mais pource que
de tant que la personne est plus semblable en estat ses
oeures sont de tāt plus agreables ⁊ mieulx poursuy-
tes Et pource ma dame ie feray mon second compte en
acquittant ce q̄ iay dict ⁊ parleray dune tresVertuse ⁊
charitable princesse ⁊ feray mon compte le plus abregie
que ie pourray Si nous dicte ⁊ recite lhystoire que le cō-
te Regnier de Sauoye se maria avecques la fille du Roy
de Dannemarche nommee Geltrud ⁊ fut amenee si ieuz
ne en la maisō de Sauoie q̄ legieremēt auoit elle apzins
le langage / les meurs ⁊ les conditiōs dudict pays de
Sauoye / ⁊ d'elle ⁊ de sa tresnoble nature fut enclinee a
denotion ⁊ moult fut charitable aus⁹ pources creatures
Et aussi ce quelle pouoit finer ou auoir des biens de son
seigneur ⁊ d'elle / elle les donnoit pour lamour de nostre
seigneur Ihesucrist ⁊ departoit aus⁹ pources de moult
grans deniers ⁊ pecunes Et tant en fist que Regnier

conte de Sauoye son mary par enhoit d'autrui ou au-
tremēt n'estoit pas bien content de Geltrud sa femme en
ceste partye ⁊ trouuoyt ses deniers fort despenses par sa
femme/et dont il estoit en grant disette ⁊ a l'arriere de ses
affaires/et en effect fut conseille de luy deffendre de pl⁹
nullemēt donner ou despēdre le sien sans son sceu congie
⁊ cōmādement A quoy ladicte contesse obtempera par
obedience et contre son cueur leq^l ardoit en parfaicte cha-
rite ⁊ ne pouoit nullemēt Deoir Vng poure sās lui dōner
ou larmoyer par grans regretz de non le pouoir faire
Aduint Vne fois entre les autres que moult grāt mul-
titude de poures se monstrent deuant la fenestre de la
bonne dame criant ⁊ requerant l'aumosne Mais celle
qui scauoit ou estoit l'argent de son seigneur si courut cel-
le part ⁊ print Vng grant sac plain de florins le mist se-
cretement en sa robe ⁊ apella Vne siēne priuee damoiselle
⁊ alla cell' pt ou les poures estoiet pour leur departir son
argēt Mais elle trouua le cōte de Sauoye son mary qui
reuenoit de chasse/lequel eut suspicion que sa feme por-
toit argent aux poures qui la estoiet ⁊ luy dist rigou-
reusement que portez vous Elle qui eut moult grant fre-
eur leua son esprit a Dieu ⁊ luy respondit monseigneur
se sont roses ⁊ tātost ouurit le rebzas de sa robbe qui se
trouua tout plain des pl⁹ belles roses du mōde ⁊ si nes-
toit pas la saiso pquoy le conte congneut que les oeures
de sa femme plaisoient moult a Dieu si la mena douce-
mēt aux poures luy priant quelle euecutast sa charite ⁊
aumosne Et lors les roses se cōuertirent en florins ⁊ en

la presence de son seigneur la contesse donna pour Dieu
au y pources tout ce quelle portoit d'argent ⁊ depuis fut
le conte grant aumosnier ⁊ charitable Voyez dames dōc
ques pour fortiffier voz oeuvres ⁊ les deux gantz de char
rite iay fait deux comptes en Vng exemple. Et Vous
souuiegne de la cōtesse de Sauoye de ses roses ⁊ de ses
Vert⁹ car charite est le plus seur ⁊ le plus brief chemin
pour Venir iusques au royaume de paradis.

C Le pigne de remors de conscience. Cha. pViii.

A noble corps est pare proprement
De triumphans ⁊ notables habitz
Dont fault le chief aorner tellement
Que tout soit bien ⁊ honnozablement
Car ma maistresse est dame de hault pris
Les beaulx cheueulx qui est Vng cas requis
Connient pigner/car a tout fault pournoir
Lest Vng des soingz que femme doit auoir

Entendez bie pourquoy des cheueulx songne
Dames discrettes qui raisoy entendent
Je nentens pas les mettre en besongne
Pour gens tempter en espoir de Vergongne
De ce meschief saigement Vous gardez
Mais il sentent quant Vous Vous mariez
Lest lenseigne dequoy se pare celle
Qui peut dire iay teste de pucelle

C Vng pigne fault diuoir blanche & pure
Pour les cheueulx de ma dame adresser
Vng noble chief ne doit souffrir ordure
Tout net/tout bon sans nulle couuerture
Car ce labeur fait beaucoup a priser
Dont pour ce pigne en bien auctoriser
Que de Vertu face signifiante
Nous en ferons remors de conscience

C Comme le pigne est fait de plusieurs dentz
Pour nectoyer les cheueulx de excellence
Par ce remors/considere & entens
Sont ramentuz les pechez & le temps
Les maulx passez & la perseuerance
Par ce remors se treuve repentance
Car ses dentz sont si trenchans & agues
Quilz treuve tout a parolles perdues

C De quatre dentz est ce pigne icy fait
Pour nettoyer peche Vice & ordure
Le premier est regret de son meffait
Le second est propos pur & parfait
De plus renchoir en vilaine laidure
Le tiers prier a Dieu dentente pure
Le quart porter fournir & satiffaire
La penitence ce point est necessaire

C Gardons ce pigne de remors entasse

Nettoyons bien chef & entendement
Confessons nous du temps qui est passe
Car l'aduenir doit estre compasse
De seur propos & Vray amendement
Pourtant madame pignez Vous frequemment
Affin quoy die Vela p^rincesse bonne
Digne dauoir & de porter couronne

CExemple de remors de conscience

EA la cite dantioche eut Vne gr^ade dame & la plus noble de la cite nommee Pelagienne laquelle fut femme si pompeuse que quant elle alloit par la cite ses parem^es & Vestures luysoient tout dor & de pierres precieuses / Et pour le lustre des pierres fut puis appelee Marguerite Pelagienne elle triumphoit en parure de cheueulx & en faisoit ses monstres & moult fut curieuse de monst^rer ses beaultes & richesses. Et qui ainsi fait il fait iuger communem^et contre sa chastete & ses Vertus & alloit icelle fort ac^opaignee de dames & iouuenceaulx / & de diuers instrumens & courroit le peuple au deuant de Marguerite Pelagienne comme deuant Vne deesse. Lors Vnq saint homme n^ome Bonus qui estoit euesque de Anthioche la r^econtra cheminant ainsi en ceste modaine pompe qui luy sembla moult de^odonnee. Par quoy prestement se laissa cheoir & prosterner a la terre en grans larmes souppirs & g^emissements. Et disoit h^eult & cl^erement Helas ie Voy

Vng cheual desbrié & sans frein Vne ame a qui le sens
est failliy/Vng entedement perdu & ebette/beaulx yeulx
sans clarte & sans veoir Et la creature que Dieu a faicte
donne es mains de lennemy qui la maine hors de la
Voie de paradis ou sentier & destroit du parfont denfer
Pelagienne fut aduertie du deprisement que le saint eue-
sque faisoit de ses pompes & parures & touteffois Vint
en personne au sermon dudit euesque & si bien incorpora
& mist en lempainte de son cuer ses saintes doctrines
que Dieu luy fist grace de soy repentir. Print ledict eue-
sq par les piedz deuotement & se rendit a luy en luy di-
sant treshumblement/perce saint ie metz en Voz mains
moy miserable creature desnoyee & en perdition se Dieu
na pitie & misericorde de ceste pecheresse : & en ce disant
plouroit moult pitieusement & de cuer profond leuesque
la receut humainement & la baptiza & l'aua de ses pechez
& elle donna ses biens aux pource creatures se tira se-
crettement au mont doline/ou elle print l'habit d'homme
& de religieux & puis mena moult sainte Vie Et apres
sa mort fut trouuee par plusieurs saintes personnes qui
la sepulchrent que cestoit Vne femme dot moult seruier-
ueillerent & fist depuis moult de beaulx miracles. Or
mes dames soyons en repétance de noz pompes & Vaniz-
tez Soyons semblables a Pelagienne & ressemblons la
Marguerite reluisant en Vertu nayons pas honte ne des-
pit de estre reprinses de noz oultrecuydances/mais ay-
ons remors de conscience & amour parfaicte a celuy qui
charitablement nous chastie de noz Vices & par ainsi se-

ront nos deffaulx ⁊ pechez pardonnez de nostre createur.

C Le ruban de crainte de Dieu.

Lha. viij.

A Les beaulx cheueux pignent honnestement
Dun blanc ruban nous conuiedra brocher
Et les couchier sur le chief tellement
Que les cheueux naperent nullement
Plus vault la chose plus se doit tenir cher
Temps est de monstrier ⁊ temps est de cacher
Fuyz deuez daultreuy temptacion
Pour euitier dure dampnacion

C Le ruban soit de fil moyen tissu
Pour mieulx tenir des cheueulx la lyeure
Le riche bien doit estre peu perceu
Le bien secret est par desir conceu
Le metz commun nest pas bonne pasture
Pecher de soy cest oeuvre de nature
Mais procurer aultreuy en malefice
Double sur soy le peche ⁊ le vice

C A ce ruban qui tient en ferme lieu
Des beaulx cheueulx dont ma dame satourne
Nous luy donrons en nom crainte de Dieu
Qui pense bien ce nom: est saige ⁊ preu
Car il resueille les Vertus ⁊ adiourne
Eureux celuy qui des Vices retourne

Et malheureux qui demeure en la fange
Seruant le dyable & laisse le bon ange

Crainte de Dieu qui n'est pas sans amour
Aussi amour ne peut estre sans crainte
Parons nous en & de nuyt & de iour
C'est le dongon le chasteau & la tour
Pour preseruer les cueurs de malice atteinte
Le bon Dieu Veult qu'on le craigne sans sainte
Quant a amour cest l'amour des prescheurs
Pour rappeler a pardon les pecheurs

Efuyés tousiours faulx semblâs & oeuillades
Ayons maintien ferme constant & saige
Rapetons point de faire gens malades
Par motz subtilz/par rōdeaulx/par ballades
Qui de present sont en cours & Vsaige
Ne fardons point le front ne le Vsaige
Fuyons la cause qui aultruy bien empire
C'est Vng peche qui ne peut estre pire

Crainte de Dieu est le commencement
D'amour diuin & toute sapience
Crainte de Dieu appelle entierement
Vice & peche & rend planierement
L'homme constant pour Viure par prudence
Crainte de Dieu Vous met par preference
Tout au plus hault & dessus Vostre chef

Exemple de crainte de Dieu.

Qui beaucôp lyst de bonnes choses treuve / & ainsi Visitant mes liures & mes memoires iay trouue Vng petit Volume compile par Vne persône deuote & comtemplatiue & mesert en ma memoire presete au propos de crainte de Dieu pour le mettre en ce present epeple pour le prouffit de Vous ma noble maistresse & de toutes dames affin quelles puissent mieu y Valoir de moy escripture pour lhonneur de Vo^r car ie desire de donner a cōgnoistre que l'on se doit garder de toute sapuissance de tempter aultruy & nulz mettre en Voie de pechie. Et a ce propos recite maistre Jacques de Vitry aucteur moult auctentique entre plusieurs allegations eemples & escriptz par luy faictz que es parties de leuent eut Vng prince ieune beau / puissant / & riche celuy prince sen amoura par concupiscence dune religieuse qui estoit bone deuote & cōstante / mais moult estoit belle de corps & de Visage celuy prince enuoya a la religieuse ses entremetteurs macquercaulx & sathalites desquelz on trouue & fine plus largement q de deuotz prescheurs ceulx persuadoient la sainte dame / par dons promesses & polies a faire & acōplir la Voultēte desordōnce de le^r seigneur mais iamaiz la religieuse ne Voult psetir a ce mesfait. Aduint que ce prince embrase du feu de lenemy se delibera de la pcedre & de lauoir a son plaisir & Vouloir

par force ou aultremēt/ ⁊ dont par la grace de Dieu elle fut aduertye ⁊ pour ce mal fuyr ⁊ escheuer elle parla a lung diceulx poursuuans faignant estre amolie de son courage ⁊ descouter ⁊ entendre es requestes que ce prince luy faisoit faire ⁊ luy dist. Amy ie te prie que ie saiche auant que ie face le plaisir de ton seigneur quel bien/quel plaisance/ ⁊ quelle beaulte il a en moy/dont il peut estre si fort emprins de mon amour le seruiteur retourna a son maistre tout cōsolle ⁊ refait de celle demāde ⁊ dist a son seigneur quil auoit bien besoigne le quel en eut moult grāt ioye/ ⁊ apres ouy la responce de la religieuse/le seigneur luy dist Va a elle ⁊ luy dy que ie luy mande quelle a entre ses grandes beaultez les plus beaulx ⁊ les plus at- trayans yeulx que ie vis oncques/dont elle men a seru iusq̃s au cuer. Le seruiteur retourna ⁊ luy declaira ce que le seigneur luy dist/ ⁊ commēt de la beaulte de ses yeulx il auoit moult a souffrir. Lors la sainte dame fist le signe de la croix ⁊ dist au sathalite attēs moy icy ⁊ ie te feray respōce/ ⁊ sans Varier ne doubter douleur ne an- goisse elle se siet en sa celle/print Vng plat de boys ⁊ de son consteau se frappa ⁊ creua ses deuy yeulx de ses pro- pres mains ⁊ les mist en iceluy plat puis appella le sa- thalite ⁊ en luy baillāt le plat luy dist tiens Va a tō maistre ⁊ luy porte ce pnt q̃ ie lui faiz de mes deuy yeux dōt ie me suis faicte quitte ⁊ ayme mieulx perdre la lu- miere du monde q̃ par moy luy ou autre perde ne eslon- gne la clarte du ciel ⁊ la haulte ioye eternelle Le serui- teur fist a son maistre ce merueilleulx present qui moult

seſbahit ⁊ fut daicu de ſon dâpnable ⁊ inique propos mes
dâes iay donne ceſte eſpèſle pour vous garder de mettre
autrui en peche par attirer les pecheurs en voſtre beaulte
⁊ ſe nous voullôs noz yeulx creuez cômme la religieuſe
ne deſaire noz beaultez corporelles ⁊ auſſi voz belles ſac-
tures q̄ eſt forte choſe ⁊ difficile à faire au moins con-
duiſez vous en telle ⁊ ſi vertueuſe maniere q̄ nē ſailiez
de pis ⁊ q̄ loy puiſſe iuger q̄ vous ſoyez dâes cōſtâtes en
Vertus ⁊ ennemyes de Vices ⁊ pechez

C Les patenostres de deuotion.

Châp. xv.

A Lors fault il pour ma dame honoree
Des patenostres de iayet ou coraſ
Du de ſin ambre pour mieulx eſtre parce
Car par cela ſera bien decoree
Elles ſont propres pour metz eſpecial
Les patenostres pour ung cuer liberal
Donnent memoire ⁊ ſouuenir de Dieu
Chacun ſe doit bien ſeruir en tout lieu

C Es patenostres conuient beauz ſigneaulx dor
Du quelles ſoient toutes dor en ſubſtance
Et eſmaillees de rouge cler encoz
Si ny fault point eſpargner ſon treſor
Car es ſigneaulx fault quelque difference
Les patenostres de deuotte apparence
Seront par moy dictes deuotion

Le nony est propre reste l'intention

C Il fait bon Voir nobles dames deuotes
Et cheminer de Vertus en Vertus
Je ne dy riens dun grant tas de bigottes
Qui contrefont ainsi les dozelottes
Car leurs cueurs sont de Vices reuestuz
Bonnes deuottes tousiours de plus en plus
Pensant a Dieu ⁊ a sa passion
Seruir Dieu est belle occupation

C Or pensons donc de cuer deuotement
Que le bon Dieu tout puissant ⁊ par fait
De riens quelconques le monde entierement
Par son seul dit la cree plainement
Et l'homme humain apres du lymon fait
Comme les bruttes ne sommes pas effect
Mais il nous fist a sa forme ⁊ ymage
Deuotement faisons a Dieu hommage

C Ayez ma dame Vraye meditation
Es patenostres de singularite
Car Vous auez bonne information
De Iesucrist pour reformation
En contemplant sa sainte charite
Pensez quil a si grande auctorite
Que dessoubz luy sont saueez ou dampnez
Tous ceulx qui furent ⁊ seront de Adam nez

Deuotion Vous soit Vertu floriz
Es patenostres comme prudente & sage
En seruent Dieu & la Vierge Marie
Non seul de bouche qui nest que ypocrisie
Mais plainement de cuer & de courage
Deuotion tout le temps de Vostre aage
Vous donnera de Dieu telle memoire
Que es diuins cieulx le Verres en sa gloire

Exemple de deuotion

Dur exemple de deuotion donner & introduire
a ma treshonoree dame descript & recite le dis-
ciple en ces sermonnaires Et lequel aussi alez
que maistre Vincent en son miroir historial Que en la
cite de Rome estoient deuy nobles personnages cestassas-
noir lhôme & la femme lesquelz furent assez loque espace
côiointz par mariage ensemble sâs auoir lignee de leurs
corps & auoient Vne singuliere deuotion a Dieu & a la
Vierge Marie Et tant que par leur deuot exercite cō-
tinue en bonnes oeures meriterent dauoir Vng beau filz
Dont aps menoiet chaste Vie Si aduit que noble mary
par feruete deuotiō entreprint aller en aucun deuot pele-
rinage & mourut faisant le chemin Et la bonne dame es-
tant Veufue en lad cite nourrissoit tousiours delicate-
ment son enfât Et le couchoit toutes les nuitz avecqs elle
dedans son lit iusques a tant quil paruit en aage Viril
tellement que par consequence il engendra Vng enfant

a sa propre mere Laquelle touteffois ne desistoit point de
sa feruente deuotion en faisant tousiours bonnes ocu-
ures & se celloit secretement affi quoy ne la congneust en
saincte & grosse denfant. Aduint le iour de soy enfante-
mēt q̃lle enfanta occultemēt en grant douleur & puis pour
crainte de cōfusiō & estre diffamee du monde estrangla
soy enfant & le getta en Vne priuee dont consequēmet le
diable denfer persecuteur des pources ames queroit & cer-
choit les moyens pour icelle dame cōfondre & luy oster sa
deuotio Parquoy il se mist en forme & espee dunc clerc
& homme littere & Vint en la cite de Rome soy disant
estre bon notaire & instruit en plusieurs sciēces & soy di-
sāt aussi scauoir reueller tous larrecins & congnoistre
choses occultes & secretes Et tellemēt qui prouua partie
de ses ditz par effect car le dyable peult aucuneffois con-
gnoistre les choses preterites par diuine permissiō Et
par telles choses fist tant yecluy dyable denfer q̃l print
& eut opportunitē d auoir accēs a lēpercur & a tout le se-
nat de Rome & leur dist en ceste maniere Je mesmer-
neille dist il & suis esbahī que toute ceste cite de Rōe nest
ia consumee & destruite pour le detestable & enorme peche
que ie congnois estre commis & perpetre en icelle Et nar-
ra le fait aduenū de ceste dicte noble dame & en la nom-
mant par soy nom dist & recita manifestement quelle a-
uoit cōceu Vng enfant de soy ppze filz lequel elle auoit
estrange/mais de ces parolles fut incontinant reprens
& redargue de tous les seigneurs citadins disant qui ne
disoit pas Vray/car icelle dame estoit estimee de tref-

bonne & louable Vie & comme estoit Vng miroer des Vertus pour la parfaicte & singuliere deuotion quelle auoyt a Dieu & a la glorieuse Vierge Marie A quoy respondit le diable ie sauois bien dist il que Vous ne me croiriez pas mais soit appelee & examinee & selle est du cas conuaincue consequemment soit bruslee & arsee / sinon que ie le soye moy mesmes comme Ad penā tallionis Fut appelee icelle dame a la poursuite dudit diable oyant son propos & son offre & comparut au palais imperial deuant le consistoire ou elle fut honnestement comme dame dhonneur & ne croient d'elle aucun mal Lombiē que iceluy diable leur sembloit estre Vng nouveau prophete lequel de rechef ainsi que notaire fist son propos a lencontre d'elle & laccusa en sa presence ainsi que dessus Si luy fut cōmande de par lempereur de soy expurger & iustifier? ou quelle confessast le cas A quoy elle respondit Salomon nous enseigne faire toutes choses p conseil parquoy ie demande temps & induces pour chercher aucun qui responde pour moy? car ie suys Vne seule femme a qui nest loy de procurer Si obtint ce q̃lle demanda & luy fut de brief assigne iour pour retourner & comparoir deuant la sistance A doncques Vint hūblement au Pape qui pour lors estoit & par singuliere deuotion & en grande effusion de larmes & amartitude de cuer se cōfessa de sō peche & deuotement en demandoit graces a Dieu & telle penitance eniointe que son ame ne fust perie. Lors le Pape la consola en luy remonstrant & allegant la misericorde de nostre seigneur pour sa bonne deuotion / affin q̃lle ne se

desesperast dont le porta diligēment innocquer la yde de
la sacree Vierge Marie q̄ la pourroit desirer de tout mal
en corps ⁊ en ame ⁊ pource q̄lle auoit peu despace a res-
pondre du cas dont ainsi estoit accusee Lōgnoissant sa
grande deuotion lui chargea seulement de dire Vng pater
noster ⁊ aue maria pour la penitāce de tous ses peches.
Puis au iour a elle ordonne retourna audit consistoire
ou estoient assemblez les princes senateurs aueques lē-
pereur ⁊ elle estant au mellieu deulx pour respondre du
cas/ fut dit a icelluy diable qui estoit en forme de notaire
que il fist accusation a lencontre dicelle dame Lequel res-
pōdit q̄l ne congnoissoit aucun mal en elle commēt dist il
en pourroye mal dire ou parler quāt ie Voy Marie la me-
re de Dieu estāt aueques elle pour la garder de diffame
Lors oiant parler ce diable se signerent toz du signe de
la croix parquoy incōtinant se disparut pnt tout laudi-
toire ⁊ la noble dāe demoura honoree desēpereur ⁊ de tous
les princes senateurs q̄ y estoient en rendant graces ⁊
louanges a la glorieuse Vierge Marie qui ainsi pseruent
⁊ gardent ceulx qui ont bonne ⁊ entiere deuotion a eulx
⁊ pource dāes ⁊ femmes dhonneur ayez tousiours pfaic-
te deuotiō a Dieu ⁊ a sa digne mere pour Vo^r garder de
tout diffame ⁊ estre preseruez de lēnemy denfer affin dacz
querir paradis.

La coiffe de honte de meffaire Chap. pvi.
A Differ nous fault les cheueulx ⁊ la teste
De ma maistresse pour son atour tenir
Car sil tomboit pas ne seroit honnesté

Ceste coiffe qui n'est pas deshonneste
Doz ⁊ de soye sera pour soustenir
Nom ie luy donne pour le mieulx retenir
Entre Vertus Braye honte de meffaire
Le pensement peult beaucoup de biens faire

Comme la coiffe est tissue ⁊ lasse
Communement a facon dune roitz
Honte a des yeulx maint regard ⁊ Disce
En bon propos qui est bien aduisee
Pour corriger les faulces ⁊ desroys
Autant en dis aux princes ⁊ aux Roys
Qui honte na honneur ne peult nourrir
Honte refraint mauulx qui sont mains perir

Honte est la fleur des perles precieuses
Honte soustient la dame a estre bonne
Honte maintient les femmes Vertueuses
Honte reboute les oeuvres Dicieuses
Entre Vertus ⁊ Dices cest la bonne
Honte est le fruit que bonnes meurs flouironne
Du honte n'est honneur na iamais lieu
Pensez y dames qui Voulez seruir Dieu

Honte ⁊ Vergongne cest Une mesme chose
Et sont les filles dhonneur ⁊ de prudence
Dessoubz icelles est enfermee la rose
Que dangier tient enfermee ⁊ enclose

Que homme ny touche car ce seroit offense
Toutes dames pour soy chascune y pense
Car ce laymant y prenoit Vne entree
Dictes a Dieu la bonne renommee

Efuyons Venus qui honte met en chasse
Fuyons oyseuse ou Venus se repaire
Jamais meffait ne doit Venir en place
Qui na mesprins il peult leuer la face
Contre le ciel ou chacun se doit traire
Pour paruenir a ce treshault affaire
De nostre honneur tousiours fort decozer
Il nous fault Dieu seruir ⁊ honnozer

Egarder nous fault de toute esmotion
Pour foyr Vice ⁊ dautruy ⁊ de soy
Qui ne se Deult mettre en perdition
L'escripture nous en fait mencion
Et est ainsi Vng article de foy
Qui fait pecher autruy cest contre loy
Et Vauldroit mieulx estre mains agreable
Que dencourir la peine pardurable

Exemple de honte de meffaire

Plusieurs fois a este la cite de Iherusalem ⁊ la
terre sainte conquise ⁊ possedee par les Sar-
razins sur les Crestiens ⁊ par les Crestiens sur

les Sarrazins ⁊ dont a presēt les infidelles possèdent cel-
le sainte ⁊ digne terre/au grant esclādre dommager ⁊ pre-
iudice de nostre sainte foy catholique. Et est ce meschief
par les haynes Vengeances ⁊ malueillances des Roys ⁊
princes crestiens qui iournellemēt guerroiēt luy a l'au-
tre/oubliant Dieu ⁊ son saint seruice pour leur Vindi-
cation desordonnee A quoi Dieu Dueille pourueoir par
sa sainte misericorde. Et a ce propos ie treuve en Vng liu-
re qui se nomme Leteranus dit herati. Et dit par Vng ac-
teur en maniere de pemple qui vault bien destre rame-
nee a memoire sur le point de honte de meffaire. Que a
la seconde conqueste que firent les payens de la sainte
cite de Jherusalem par le souldan prince ⁊ sourbarin de
Perse/que entre Jherusalem ⁊ Bethleez auoit Vng cou-
uent de religieuses de lordre de saint Dominique moult
deuotes ⁊ de sainte Vie Et toutes fois en ce college auoit
de moult belles dames ⁊ en grant nombre. Et apres plu-
sieurs infidelles cruaultes epecutees par ledit souldā ⁊
par les Sarrazins sur les Crestiens A celle poursuite ⁊
prinse Et que sa conqueste estoit comme assuree a son
prouffit/luy plain de Vices ⁊ de cruaultez acompaigne
de gens de sa secte damnable condition ⁊ peruerse natu-
re/ouyt parler dicelle religion ⁊ des belles dames qui y
estoient/ ⁊ se delibera en despit de nostre sainte foy de des-
truire icelle abbaye violer ⁊ deshonorer les saintes reli-
gieuses ⁊ les mettre a perdition ⁊ luy mesme en sa per-
sonne estre le chief de celle violence/Vng deuot conuers
seruiteur de l'abbesse par la grace de nostre seigneur en

fut aduertý & courut dire a la maistresse la cõclusion
prinse du soul day. La sainte dame appella ses religieu-
ses & leur fist Vng sermon en leur remonstrant le peril
ou elles estoiet leur reduisoit a memoire le Dieu de leur
religion en leur disant moult doucement Mes filles en
Dieu ayez cuer & couraige de biẽ garder Vostre Virgi-
nite qui est la fleur & la rose quoy ne peult recouurer. Et
cest pour dire mal sur mal agraument de peche eppres
regret perpetuel & creuement de cuer destre Villaine-
ment ahontees du monde & apres dampnees & perdues
perpetuellemẽt leur priant doucement de leur declairer
leur Vouloir. Les bonnes religieuses toutes d'ung accord
respondirent nous aymons mieulx mourir que de porter
la hõte dauoir perdu nostre chastete & corrompre le Dieu
de nostre religion. Lors la bẽne abbesse fut moult res-
iouye dentendre leur ferme & bon Vouloir. Et leur dist
mes bonnes filles puis que Vous auez si ferme crainte
de Dieu & honte de meffaire & que Vostre Dieu est deuant
Voz yeulx pour le tenir & garder saintement sans point
Varier Je Vous prie que soyez toutes fermes & delibe-
rees de faire ce que ie feray de ma personne. Et iay es-
poir en Iesuchrist que sans mort recepuoir le tirant cruet
Vous laissera en paiz & en franchise de Voz personnes/
ayez chascune Vng coustel tout prest en sa main & ensuy-
uez mon oeuure & faictes ce que ie feray si gaignerõs pa-
radis Et lors toutes l'accorderent & le firent. Et quãt le
souldã & ses gẽs approcherent iceluy conuẽt & la religion/
les bõnes dames ouurirẽt les portes & les huys & prestez

mēt l'abbessē courageusēmēt se coppa le nez. Et les aul-
tres l'esuierēt seblablement : ⁊ q̄ le tirāt Vint ceste grande
constance: ⁊ quelles aymoient mieulx estre deffigurees
que porter la honte de meffaire ⁊ de peche il sen retour-
na tout confus ⁊ les laissa paisibles. Et Deult on dire
que la terre surquoy le sang diceulx nez coupez tumba
portent petis arbres ⁊ rameaux esquelz Vient Vne graiz-
ne dont on faict patenostres qui ont figures ⁊ Visages
de nez coppez/ ⁊ certes ien ay Ven de telles. Or doncques
dames qui moy liure lisez sur toutes choses ayez en me-
moire la noble coiffe / de honte de meffaire et Vous souz-
iengne des saintes religieuses qui ne doubterēt douleur
angoisse ne a deffigurer leurs faces pour sauluer leurs
ames ⁊ leurs honneurs qui est le plus grant biē que nous
pouons auoir en ciel ne en terre. ⁊c.

C Les tēplettes de prudence.

Chap. xxi.

O R est coiffée ma dame debonnaire
Si nous conuient conduire son atour
D'une templette ou naura que reffaire
De couleur pprie pour auoir Voyas mieulx plaire
Sus le cerueau doit faire son sejour
Nom de Vertu fault quelle ait a son tour
Dont ma maistresse puisse auoir relucence
Pour ce luy donne le tiltre de prudence

C Prudence scet deniser terre ⁊ mer

Et tient Vers Dieu femme & homme paisible
Prudence fait tout homme renommer
Et des merueilles fait la chose possible
Prudence fait amollir cuer terrible
Si la mettons sur nostre entendement
Se nous querons de Viure saigement

Prudence fault a femme quoy quil couste
De telz Vertus doit dame estre parcee
Prudence nest ne en bras ne en couste
Mais est au chief qui doit parle ou esconte
Par la le cuer declaire sa pensee
Se Vous Voulez donc bien estre aornee
Ayez prudence pour estre Vostre guyde
Qui na prudence cest Vng cheual sans bride

Le poete fainct prudence Vne sphere
Du les Vertus preignent leur influence
Boece aussi prudence bien compere
A la geline qui garde comme mere
Ses poussinetz de mal & de greuance
Ainsi prudence soubz ses helles sauance
A mettre ensemble Vertus & les garder
Ma chere dame Vucillez y regarder

Alyons prudence se Voullons paruenir
En paradis ou sommes appelez
Sans prudence nous ny pouons Venir

Si nous conuient de tout Vice abstenir
Puis par Vertu serons tous consolez
Prudence paist les pources desolez
En leurs donnant si bon sens & scauoir
Que l'ennemy ne les peut deceuoir

CAlions prudence qui Va le droit chemin
Fuyons cautelle ou Vertus perdent lieu
Qui bien Voyage il est bon pelerin
Eureuy est cil qui Vient a bonne fin
Qui ne peut estre sans layde de Dieu
Prenez en gre mon desir humble & pieu
Deu quoy Vous nomme princesse si parfaite
Que Dieu Vous a de sa propre main faicte

Soyons prudens pour seure Voie eslire
Soyons saiges sans estre fornoyez
Soyons subtilz pour euitier le pire
Soyons constans pour soy taire ou bien dire
Vous tous & toutes qui ce liure lirez
Par prudence tous Voiz faitz prouoyez
Cest la Vertu qui Voiz faitz guidera
Si saigement que loy Vous prifera

Exemple de prudence.

SAluste descript & recite/en Vng pas de ses ensei-
gnemēs q̄ loy ne peut mieulx donner eexemple
pour estre biē incorpore & entendu que de parler

de semblable a semblable. Et pource madame que vous
estes princesse de haulte natiuite ie vous donneray e-
xemple ceste fois de ma dame sainte Vaudrūt/ys-
sue de toutes pars de nobles ⁊ principales maisōs. Et treu-
ue que du tēps du roy Dagober Roy de France ⁊ filz de Lo-
taire Vng noble pīce nōme Vaudert hōme moult renō-
me/fut marie a Vne noble dame de lignee royalle nōmee
Versilie. Lesquelz eurent Vne fille q fut ceste sainte
madame Vaudrūt / mais ie me tairay a presēt de ses
seurs ⁊ de son lignage ou il y ent moult de saictes pson-
nes hōmes ⁊ fēmes. Ceste dame sainte Vaudrūt fut
p succession cōtesse de Haynault ⁊ fut mariee a Vng no-
ble prince nomme Waldegair. Lesq̃lz se gouvernerēt si
saictemēt enseble quoy le dit fait ⁊ elle sainte. Et fut de-
puis iceluy prince nomme Waldegair Vincien/pource
q vainquit les Vices ⁊ fonda ceste belle eglise de Sō-
nyes ou il est encores haultemēt esleue ⁊ honnore ⁊ fait
de grans ⁊ Vertueux miracles. Si retournerons a par-
ler de ceste sainte princesse q si Vertueusemēt se condui-
soit avec son mary ⁊ en si grāt prudence q Dieu les a to-
deux appellez cōe il apt. Ceste ieune princesse en ses ie-
unes iours print la Voie solitaire ⁊ cōtēplatiue en despri-
sāt le mōde p grade prudēce elle ēploya ses biēs tēporel-
les a nourrir les pures creatures/a ediffier ⁊ foder eglises
⁊ p prudēt regard cōsidera la grant noblesse q est dāciē-
nete heritee es pais de Haynault ⁊ q plusieurs nobles
hōes to⁹ chargez dēfais ⁊ sōt en grāt foi de les ētreenir ⁊
heriter: pourquoy p grāt prudēce mist puisioy pour no-

bles femmes Vertueusement eleuer ou seruice de Dieu &
Viure de ses biens. Et eut regard que du temps des
Romains cōbien quilz estoient payès les grans & les
nobles faisoient nourrir leurs filles es temples & es
lieux deuotz pour auoir le renom destre Vertueuse/dont
souuent aduenoit quelles estoient requises & mariees a
leurs grans honneurs & prouffit. Aussi ceste Vertueu-
se p̄cesse fonda cloistres & eglises ou sont nobles fem-
mes nourries au seruice de nostre seigneur & se peuent ma-
rier quant il leur plaist & quelles treuuent leurs parties/
car elles ne Vouent que obediēce seulement & seruent
nostre seigneur reueremēt & en obeissāce de celle qui est
leur chief & leur par dessus/& par la prudēce de ceste sain-
te dame a l'entretènement & soulagement de noblesse elle
fist & ordonna sa fondation que nulle ne doibt entrer ne
estre receues es cloistres desdictes religiōs silz ne sōt ieu-
nes & en aage discipliable nobles de quatre lignees &
filles de cheualier/& les chanoynes pour seruir l'office di-
uin doivent estre nobles ou gradez en science/lesquelles
choses sont encores obseruees / & principalement en ce
tressainct & hōnorable cloistre de Mons en Haynault ou
gist & repose le tresdigne & saint corps de ceste noble fō-
deresse ma dame sainte Vauldrut & iay veu & congneu
tant de nobles damoiselles seruantes a nostre seigneur
Jesus estre au lieu dessusdit que ie ne les scay assez pri-
sez & honorer en mon escript et la cōgnoissance q̄ iay eu
d'elles & de leurs bonnes meurs me fait iuger quelles fu-
rēt fondees de saintes & deuottes personnes & par la

grace de Dieu se sont honozablemēt maintenues ⁊ dont
plusieurs ont estees grādemēt mariees ⁊ autres sont de-
mourees au seruice de Dieu selon la Voultē de chascūe
haulte princesse en faueur de quoy iay ce p̄sent Volume ⁊
ses habillemēs compzins de mettre en forme ⁊ en ordre ⁊
pourtant toutes autres dames damoiselles ⁊ autres
femmes ⁊ especialemēt Vous nobles damoiselles de clois-
tre seruāz ⁊ viuans de la fondation de ceste sainte dame
prenez la prudence de Viure de Vostre foderesse ensuyuez
ses meurs ⁊ sa Vie Vous gaignerez honneur ⁊ paradis.

C Le chapperon de bonne esperance. Lhap. p̄liii.

Pour donc parfaire de ma dame latour
Conuient auoir boy aduis ⁊ regard
Couturier qui fait le comble dunc tour
Quiert le moyen la pratique ⁊ le tour
Pour la parer car oy ny a regard
Ainsi me fault trouuer moyen ⁊ art
Que ie parface mon oeuvre seullement
Que ma maistresse en soit plus noblement

C Je Vis atours de diuerses manieres
Porter aux dames pour les mieulx atourner
Latour deuant ⁊ celsuy en derriere
Les haults bonnetz coeuurechifz a banieres
Les haultes cornes pour dames triumphez
Maintenant Voy simples atours porter

Qui bien me plaist se sont les chapperons
Du temps present parquoy en parlerons

C Les chapperons dhonneur et contenance
Des dames sont de Velours ou satin
Et les bourgeois les ont par differance
De beau drap noir ou rouge a leur plaisance
Chascun estat nest pas pareil en fin
Dont ma maistresse que iayme de cuer fin
Tel chapperon aurez presentement
Du toutes dames prendront amendement

Le chapperon tient le chef en sante
Et le garde de rume et de froidure
La cervelle tient en prosperite
Lentendement en bonne auctorite
Et la memoire subtille par droicture
Sante de chef demande couuerture
Car se le chef souffre quelque douleur
Les autres membres nen ont pas du meilleur

D nous convient pour donner congnoissance
De la Vertu que Deult ce chapperon
Nous luy dontrons nom de bonne esperance
Car il approche le chef et son essence
Plus que autre habit clerement le voit on
Dieu nous donna sur tous ce riche don
Que nous auons au ciel le chief dresse

La beste brutte a le sien abaisse

C Puis que Dieu donc tant de bonte nous fait
Que nous tournons ⁊ les yeulx ⁊ la chere
Tirant au ciel ou est le lieu par fait
De paradis quoy acquiert par bien fait
Par foy/par foy/par Vertu/par lumiere
Nous deuons bien celle grace auoir chere
Et esperance auoir au createur
Qui tant de biens nous depart ⁊ dhonneur

E sperance porte l'eschelle ⁊ dresse
Pour escheller le ciel ⁊ paradis
Esperance nous conduist ⁊ adresse
Pour paruenir a la haulte lyesse
Destre sauez es bras du crucifix
Sans esperance nous sommes desconfis
Par l'ennemy qui tousiours nous argue
Qui na espoir sa querelle est perdue

A yons en Dieu le espoir du diuin estre
Esperons tous en la Vierge sa mere
Qui nous menra pour nous seoir a la dextre
Du createur au grant iour qui doit estre
Du iugement ou fault que tout appere
Doulce sera la sentence ou amere
Car par iustice le iuge ingera
Lors Viendra tart qui mercy requerra

Bonne esperance se prent en bonne Vie
Et qui bien Vit on le Doit bien finir
Car qui bien fine Dieu est de sa partie
Qui Dieu acquiert il a gloire infinie
Et iouyt lame du paradis sans per
Soyons tous sages pour ce monde eschapper
Qui dure peu ⁊ si est transitoire
Si acquerons perpetuelle gloire

Exemple de bonne esperance.

Affin de donner Vraie exemple desperâce bone
⁊ entiere ie ne treuve meilleur ne plus auten-
tique de sainte Cecille laquelle fut Rom-
maine nee ⁊ yssue des pl⁹ nobles citadins ⁊ habitans de
Rome ceste bonne Cecille des soy enfance estudia ⁊ ap-
print secrettement les pointz ⁊ articles de la foy crestien-
ne qui moult luy plaisoit ⁊ y print telle deuotion q^{lle} por-
toit tousiours sur soy ⁊ contre sa poitrine la sainte enā-
gile saint Iehan en escript ⁊ se mist si fermemēt en es-
perâce daller en paradis par tenir la foy crestienne quelle
parloit tousiours a toute heure de Dieu son passe tēps es-
toit destre en oraison ⁊ de prier deuotemēt a Dieu nostre
sauueur ⁊ redēpteur Ihesucrist quil la gardast ⁊ main-
tint en foy en Virginite ⁊ en honneste Vie des sa plus ieu-
ne enfance elle ieunoit trois iours la sepmaine Lesquel-
les choses elle faisoit secrettement car encoze nestoit Rōe
ferme en la foy de Ihesucrist ⁊ plus y auoit dido^lastres

q̄ de creſtiens ⁊ meſmes les gouuerneurs ⁊ les princi-
paux en offices dicelles cite Et pource eſtoit belle ⁊ riche
de grâs ⁊ puiſſans parès elle fut tât preſſee ⁊ requiſe
quelle ſe accorda de ſoy marier a Vng noble iouuencel
nomme Valeriè/mais touſiours auoit ferme eſperète en
la grace de Dieu quil la garderoit en ſa chaſte Virgini-
te ⁊ le iour de ſes nopces Veſtue ⁊ habituee richement pa-
ree dor ⁊ de piereries ⁊ aultres habillemeſ nupciaux el-
le chantoit en ſo cuer ſans ouurir la bouche louenges ⁊
requeſtes a Dieu quil ne la Vouliſt point ſouffrir ma-
culer ne defflourer mais la garder en ſa pure Virginité
Douce Et en ce propos ⁊ ferme eſperance ſe coucha au lict
nupcial prepare pour ſon mary ⁊ elle auq̄ lit Valerien
ſon eſpoux ne tarda gueres de Venir ⁊ de ſoy coucher Et
quant ilz furent enſemble ſeul a ſeul lors moult humble-
ment ⁊ doucement diſt Cecille a ſon mary Mon amy ⁊
treſcher eſpoux ie Vous ay a dire Vng ſecret qui moult
touche le biē de Vous ⁊ de moy ſi Vous me Voules iurez
⁊ promettre que Vous ne ſe reuelerez a perſonne ce que
Valeriè luy promiſt ⁊ iura de non iamais ſe reueler La
ſainte Vierge Cecille ayant ferme eſperâce en laiſde de
Dieu pour maintenir ſon Virginal deſir luy diſt Mon a-
my ay Vng ange de Dieu qui maine ⁊ garde mon corps
en ma Virginité dont ſi perçoit que Vous me aymer de
nette pure ⁊ chaſte amour il Vous aymera comme il faict
moy mais auſſi ſi cōgnoiſt le contraire ie doute quil ne
face aulcū deſplaiſir a Voſtre perſone dōt il me deſplai-
roit Vous priant en ſhonneur de Dieu que me mainte-

nes au desir de mon ange ⁊ de moy Lors Valeriē receut
les saintes parolles de sa bonne espouse ⁊ par bōne ma-
niere moiēnant la grace du benoist saint esprit qui creut
la parolle de la Vierge sainte Cecille mais cōe foy est dis-
ficile destre entēdue legierement de corps humain sans
la grande grace de Dieu Le bon hōe Valerien luy requist
q̃lle luy mōstrast son āge affi de luy auerer ⁊ mōstre
Vraies ses polles ⁊ doubta q̃lle neust autre entendemēt
⁊ q̃lle ne fust abusee d'aucū hōme en lieu d'ung ange ⁊
pource le vouloit il Voir Surquoy la sainte dāe luy res-
pōdit se Vous Voulez croire en Jesucrist ⁊ Vous faire
baptiser cōe filz de Dieu ⁊ de son eglise Vous le pourrez
Voir cōme moy mais il ne se monstre point aux ydola-
tres ne tenāt la loy damnable ⁊ abusee que Vous tenez
Et tant prescha p Vraies remōstrances la sainte dame
son mary quil se leua ⁊ salla faire baptiser par saint V-
bain lors Pape ⁊ tenāt le saint siege papal de Rōme ⁊
puis retourna a son espouse laquelle il trouua en sa chā-
bre deuissant avec son ange qui tenoit en ses mains deu
courōnes de roses ⁊ de fleurs de lys desq̃lles il dōna lū-
ne a Valerien ⁊ lautre a sainte Cecille ⁊ leur dist a tous
deu y gardez biē ses deu courōnes car ie les ay aporrees
de paradis pour Vo^r courōner de chaste Virginite ⁊ iama-
is ne pdrōt leur frescheur Vigueur ⁊ odeur redolēte ⁊ ne
pourra persōne Voir sil nest chaste ⁊ Vierge de corps ⁊
de pensee ⁊ toy Valeriē a cause q̃ tu as Vse de bō conseil
⁊ q̃ tu tes fait crestiē demāde a Dieu ce q̃ tu Vouldras ⁊
il te sera octroye Surquoy Valeriē Voyāt la resplēdeur

de sàge luy respondit Je remercie hùblement mô crea-
teur Jesucrist ⁊ ne demàde que sa grace ⁊ la còuersiõ de
mon frere Thiburciè qui est deceu ⁊ abuse en sa loy ⁊ trop
plain de môdanite ⁊ surce ceste polle ⁊ reqste prestemèt
entra Thiburciè q̄ mout sesmerneilla de lodeur qui sen-
tit a lètree de la châbre ou ilz estoiet ⁊ mesmes Une odeur
de roses dõt il nestoit poit la saison le biè Diegnât fut
grât entre eulx ⁊ les remôstrâces a luy faictes p̄ les deuy
chastes ⁊ Vierges mariez si biè dictes p̄ iceulx ⁊ au si
prise de la p̄ de Thiburciè q̄ p̄ còclusion resoluë Valeriè
mena iceluy Thiburciën son frere baptiser ⁊ châcea tou-
tes ses còdiciõs en amèdemèt de Vie ⁊ fut si adõne a nos-
tre seignr q̄l ploït souuent aux saitz anges de Dieu ⁊
receuoit doctrie deulx qui le cõfermoiet en la foy de Jhūs
les.ii freres furèt deuoz en aumosnes ⁊ en sepuelissoiet
les corps des martirs môlt biè ilz furèt acusez au p̄uost
de Ròme nôme Almachius leq̄l leur Doullut faire adorer
les ydolles ce q̄l refuserèt en ferme foy dont ilz receurèt
la couròne de martire car le tirât les fist decoller ⁊ mou-
rir Mapim⁹ qui estoit payè garde des prisõs les auoit
gardez prisoniers certiffia qui Dit porter les anges leurs
ames en padis ⁊ de ce se còuertist Mapim⁹ ⁊ plusieurs
autres en grant nôbre saite Lecille enterra ⁊ ensepuelit
les deuy sains corps ⁊ fait on deuy memoire ⁊ feste avec
les martirs le v.iiii.iour dauril Almachius le tirant
pour auoir les bñs de Valeriè ⁊ de son frere fist prèdre
saite Lecille ⁊ luy Doullut faire adorer les ydolles ce
q̄lle refusa còme plaine de ferme esperance de son salut

Le tirant la fist entrer en Vng bain bouillât ⁊ ardent
qui riens ne lempira ⁊ quant il vit quelle ne mourroit
poit mais Viuoit tousiours en nostre seigneur ⁊ pres-
choyt la foy catholique / il la fist en ce bain decoller ⁊
martirer ⁊ faillit le boureau troys foiz de luy couper la
teste ⁊ demora le col demi coupe troys iours ⁊ elle estoit
en Vie par l'esperance q̃le auoit en Ihesucrist ⁊ tousiours
parloit preschoit ⁊ confortoit le peuple crestien Et re-
quist que sa maison fust desdiee pour le seruice de Dieu
Et ainsi morut martire sainte Cecille qui ne fust pas
frustree de son esperance car elle est sauuee sainte ⁊ ca-
nonisee Parquoy mes dames qui l'yez mon epistre sup-
ues le train de sainte Cecille ⁊ demeurez fermes en bon-
ne esperance car nostre sauueur Iesuchrist est racheteur
de nous par Verite ⁊ non pas abuseur ne decepueut en
ses parolles ⁊ promesses

C Les paillettes de richesse de cuer. Chap. pp.iiii.

A chapperon pour embelir ses gēstes
Nous fault parer selon le tēps q̃ court
Daffiqtz dor/de chaines/de paillettes
Pour embellir ⁊ estre ioliettes
Cest la maniere maintenant de la court
Après les grandes chascune da ⁊ court
Soit en habit ou de chef ou de corps
A qui mieulx mieulx ⁊ par communs accors

Tout est bien fait riens ne Dueil contredire
Mais que Vertu ne soit pas delaissee
Dont Vne fault sur ce point cy essire
Si dignement quoy ne puisse mesdire
En fournissant nostre oeuvre commencee
Ceste richesse sera bien aduancee
Entre Vertus par richesse de cuer
Cest Vng tresor contre toute langueur

La richesse qui plus le cuer conforte
Le resiouyt ⁊ le tient en plaisance
Cest quant bon los acquiert ⁊ porte
Et quelle est franche de cuer ⁊ bonne sorte
Ceste richesse passe toute cheuance
Et puis quant lame se sent en sa balance
Quicte de Vices ⁊ de pechez maulditz
Cest la richesse pour le cuer que ie dis

Riche est le cuer tout plaisant ⁊ ioyeux
Quant il se sent sans reproche ⁊ sans tache
Et par contraire tout poure ⁊ langoureux
Sentir en soy Vng meffait dangereux
Cest Vng regret qui grant douleur atache
Lame ⁊ le cuer affin que chascun sache
Doient estre gardez si nettement
Que tout ioyeux en soit le pensement

Cest tout soulas q̄ danoir le cuer munde

Du il ny ait que franche loyaulte
Et nest plaisir si ioyeux en ce monde
Car la dedans toute richesse habonde
Joye ⁊ honneur plain de felicite
Vng franc cueur net ne craint aduersite
Riche de cueur vault trop plus que tout or
Au monde nest si sumptueux tresor

C Fuyons meffait ayons saine pensee
Gardons lhonneur son Deult que le cueur rye
Faisons les oeuvres dont lame soit sauuee
Ce sont moyens dauoir longue duree
Le droit meurdrier cest la melencolie
Chascune dame qui ce liure estudie
Jugez se iayme ma dame loyaulment
En luy donnant loyal enseignement

C Exemple de richesse de cueur.

A Athoine florentin en sa cronique fait ⁊ re-
cite Vne specialle hystoire de sainte Kather-
rine de Seines de laqelle ientens lustrer ⁊ em-
bellir mon oeuvre en ce present exēple de richesse de cueur/
pour les grans graces q Dieu fist a icelle sainte Vier-
ge par les Vertus quil trouua en elle. Ceste deuote sainte
Katherine fut nee en la cite de Seines lan mil quatre
cens quarante sept ⁊ ne Desquit en ce monde que trēte ⁊
trois ās ⁊ fut canonizee par Pape Pye lan mil quatre

cès soixante & Vnze. Et disoit iceluy Pape estre descēdu
de sa lignee combien quelle fust fille d'ung tainturier/
mais honestes gēs pere & mere & de bōnes meurs En l'aa-
ge de cinq ans ceste Katherine eut Vne Vision ou amon-
nition ou elle se arresta & desira d'entrer en la tierce ordie
de saint Dominique ce quelle Voua avecques Virgini-
te perpetuelle. Et fut des ce tēps toute donnee a Dieu &
en sō fait seruice ou elle continua deuotement & pl⁹ Ves-
noit auant en aage & plus estoit ferme & seruente en la-
mour de nostre seigneur Jesuchrist & de sa sainte Vier-
ge mere A douze ans on la Voulut marier/ce quelle ref-
fusa/elle coppa ses cheueulx osta toutes pompes mon-
daines & monstra euidēment sō desir & sa bonne deuotion
& par ceste declaration on la laissa paisible de marier/&
fut receue & Vestue en la tierce ordie de saint Dominiq
cōme elle desiroit/& elle fist de grandes deuotions en soy
abtinant de non manger p plusieurs iours fors le pre-
cieux corps de nostre seigneur Jesucrist. Et est approu-
ue que quāt soy cōfessent luy reffusoit de luy bailler le
sacremēt pource quil Vouloit q̄lle mangcast & beust com-
me les autres/ tonteffois aduēt par plusieurs fois que
partie de l'hostie que tenoit le prestre se brisoit & aloit en
la bouche de ceste sainte Vierge Katherine Voult de gra-
ces fist nostre seigneur a ceste sainte dame. Et Vne fois
luy Vit en Visiō quelle espousoit nostre seigneur Jezu-
crist pour mary. Et que la Vierge Marie cōduisoit ce
mariage/ou furēt presens saint Jehan/saint Domini-
que & David qui iouoit de la herpe a ceste noble solemp^s

nite. Et luy sebloit en ceste Vision que nostre seigneur
son espouy luy mist au doy Vng anel garny d'ung riche
dyamant en confermât s^{on} mariage. Et quant elle fut
hors de son songe ou meditation elle trouua l'anel ⁊ le
dyamant en s^{on} doy q^uelle porta toute sa Vie Et de ce saict
⁊ amoureux mariage elle Vint en si grâde perfection en-
uers nostre seigneur ⁊ en sainte deuotion q^uelle ne retint
riens d'elle ne de sa Doulente/mais se mist toute en nos-
tre seigneur Jesuchrist ⁊ luy pria deuotemēt qui luy of-
tast le cuer le Douloir ⁊ la pensee quelle le peust agrea-
blemēt seruir ⁊ a son bon plaisir/nostre seigneur Voyant
le bon zelle pour la recompēser de son present ⁊ requeste
dōna a ceste sainte sēme miraculeusemēt son propre cuer
⁊ l'érichit de la plus grât richesse de cuer que creature
peust auoir comme dauoir en eschange du sien le propre
cuer de son createur ⁊ luy faire son noble eschange. Et
nest pas merueille se en recepuant ce saint don elle fut
entieremēt confermee en toute grace de Vertus. Et pour-
ce mes dames que sainte Katherine de Seines mist son
cuer en Jesucrist ⁊ luy donna / Jesucrist aussi realle-
mēt mist son cuer en elle ⁊ luy en fist present Et croy
que ie ne scaroye alleguer plus grande richesse de cuer
que d^e celle qui fut digne dauoir le cuer du createur ⁊
sauueur du monde par querir les Vertus ⁊ fuyr les Vi-
ces ⁊ pechez/dont richemēt est colloquee au benoist roy-
aume des cieulx.

CLe signet ⁊ les anneaulx de noblesse L'hap. xv. v.

O Reste encores a madame Ung signet
Dor de ducas ⁊ de facon iolye
A demy rond esmaille pur ⁊ net
Dessus lequel pourra estre pourtrait
Pour tout denis son blason darmoyrie
Et deuy anneaulx de belle pierrerie
Dung escharboucle ⁊ saphir de richesse
Que ie diray les anneaulx de noblesse

C Il fait boy Deoir a femme belles mains
Bien aorneez belles ⁊ refulgentes
Dhonestes bagues plaisantes aux humains
Pour leurs Vertus ou sinon cest du mains
Car autrement ne sont Vers Dieu plaisantes
Et pource doncques les mains belles ⁊ gentes
Fault aonstrer ⁊ parer de Vertus
Les bonnes dames en ont les cueurs Vestus

C En ce signet ou sera le blason
Est designe de noblesse lestat
Si Vous diray selon Dieu ⁊ raison
Comment noblesse est tout temps ⁊ saison
A droit congnue ⁊ perceue tout a plat
Noblesse prent es Vertus son esbat
Qui la demonstre en toute compaignie
Mais Villain est qui fait la Vilennie

C Dautant que lor est metal precieuy

Sur tous les autres par singularite
Si est noblesse quant par faitz Vertueux
Elle degecte tous pechez Vicioux
Car cest ou gist Vraye nobilite
On voit plusieurs en grande auctorite
Nobles de non/mais grans blasphemateurs
Celz de noblesse ne sont que Usurpateurs

C Le charboucle est pierre tresprecieuse
Qui respandit & rend clarte de nuyt
Aussi ma dame par estre Vertueuse
Rendres clarte a chascun fructueuse
Car sans doubter Vertu par tout reluyt
Si fait noblesse mais sans les Vertus nuit
Je le vous dy & vous sentendez bien
Qui na Vertu en ce monde il na rien

Le saphir est Vne pierre azuree
Belle & propice a porter en les dois
Et qui preserve Vne dame assuree
Sans peur ne doute pour estre bien parsee
Le saphir est pour grans princes & Roys
Si le vous donne & fais ce que ie dois
Car ie congnois Vraye noblesse en vous
Jesus la donne a toutes & a tous

Par ces anneaulx sont les dois reliez
Comme Vertus doiuent estre en chacun

Tous nobles cueurs sont ioyeux & lyez
Quant par Vertus se sentent raliez
Il n'est tel don en secret ou commun
Or donc ma dame prenez temps opportun
A maintenir Vostre haulte noblesse
Et gardez bien que pechie ne la blesse

CA tant Vous laissez de Vertus aornee
Du bien scauez faire Vostre deuoir
De noble lieu estes yssue & nee
Parquoy Vous ay noblement ordonnee
Sans espargner or argent ne auoir
Veuillez le donc en bon gre recevoir
Pour le salut du cuer & de Vostre ame
C'est grant plaisir de seruir noble dame

Exemple de noblesse.

Apres q' iay leu & reuolue plusieurs fueilletz
pour donner & descrire exemple de entiere
noblesse Je nay point trouue pl^r propre ou di-
gne de memoire que la tresilustre tresVertueuse & tres-
noble royne de France la bonne mere du trescrestien &
glorieux roy monseigneur saint Loys Le filz du roy
Loys quatriesme. Lequel combatit & debela plusieurs
heretiques & expelia leurs heresies des pays d'albigcoys
& cote de Thoulouse Et puis apres en retournant au
pays de France trespassa deuotement en nostre seigneur

Ceste noble dame selon les cronicques ⁊ francigenes his-
toires fut fille du roy de Castille ⁊ laq̃lle apres le tres-
pas de son dit feu mary Roy de France eut en regime ⁊
gouuernement Le bon Roy saint Loys son filz estāt en
laage de douze ans Lequel elle eut en si souueraine gar-
de ⁊ recōmandation pour lintroduire es saintz comman-
demens de Dieu quelle le doctina diligemmet en toutes
bonnes ⁊ deuotes meurs par le conseil des reueres mais-
tres ⁊ religieus docteurs de lordre des freres prescheurs
⁊ aussi des freres mineurs ⁊ tellement qui fut tressouf-
fisament ap̃ris en saictes lettres ⁊ deuotes meurs ⁊ cōme
lautre Salomon estoit saige ⁊ ingenieus tout plain de
prudence ⁊ iustice par la grant sollicitude de la bonne
Royne Blanche sa mere Laquelle toute Vertueuse ⁊ plaie
de noblesse de cuer ⁊ s̃sionissant de sa saintete disoit
ainsi a iceluy son pp̃re filz le bon Roy saint Loys Mon
trescher filz disoit elle iaymeroye mieus te Deoir plus
tost mourir de mort corporelle q̃ de te Deoir offenser ton
createur par peche mortel Lesq̃lles parolles fermoit bien
denotemēt en son cuer le bon Roy saint Loys ⁊ tellement
quil na point offense Dieu son createur par pechie mor-
tel Mais a epcerce toutes oeures de misericorde par le-
portatiō de sa noble mere/car il auoit tous les iours or-
dinairement les pources pour boire ⁊ menger auecques
luy a sa propre table ⁊ insq̃s a la mort corporelle cest tou-
siours employee au seruice de nostre seigneur Iesucrist
en sepposant pour son saint nom a conquerir la sainte
terre de Iherusalem la ou il souffrit grandement dont

il a acquis paradis comme on peult amplement Deoir
par sa cronicque ⁊ sainte legende Et pource mes dames
plaise Vous auoir en deuote recordation La Vertueuse
noblesse de cueur de la bone royne Blanche la mere du
Roy saint Loys laquelle auoit sentiere ⁊ parfaicte r.o:
blesse des Vertus au cueur ⁊ Vous aures La gloire eter:
nelle.

C Le miroer dentendement par la mort Chap. pvi.

O R est madame bien paree ⁊ Vestue
De noble abit ⁊ de riche parures
Si est raison que en cas esuertue
Quelle puiſt Venir que tout soit en Value
Se tout est bien en atour ⁊ Vesture
Le darrier point nous fera les clostures
Des beaulx habitz dont lay Voulu prouoir
Pource luy donne a la fin Vng miroer

C Se miroer si sera dentendement
Tout compose illustre ⁊ bien bruny
La peult ma dame Deoir tout entierement
Du est le beau/le lait semblablement
Du est bonte ⁊ ou sens a faillx
Se lhonneur croist ou fil est amendx
Se lame est nette ou selle est empeschee
Le miroer si monstre tout de Visee

C Pour deux raisons se doit dame mirer
Lune en la face l'autre en la conscience
Se faulte y a affin de l'amender
Lung par clere eue l'autre par confesser
Sans fiction ⁊ sans oultrecuidance
La face nette iuge bonne apparence
Le cuer contrit monstre a Dieu equitte
Recongnoyssant sa diuine bonte

Mirez Vous si cuer en tout bien apais
Roynes/duchesses/contesses/ ⁊ marquises
Mirez Vous si princesses de grant pris
Leuer Vouz cuers ouurez Vos esperitz
Toutes femmes soient ieunes ou grises
Entendement monstrera ses maistrises
Par luy Verres a Vous bien remirer
Que la beaulte ne peult gueres durer

C Comme la rose en may fresche ⁊ vermeille
A en Vng iour sa grant frescheur passee
Ceste beaulte qu'on dit la non pareille
Par Vne fieur qui Vous point ⁊ traueille
Las pensez bien quelle est tantost changee
Et qui pis est celle est continuee
Le noble corps la mort le met a fin
Que lon iugeoit ainsi comme diuin

C Ses doux regards ses yeulx saiz pour plaisir

Pensez y bien il perdront leur clarte
Nez ⁊ sourcilz la bouche de loquence
Si pourriront ⁊ sera desplaisance
Mesmes a celuy qui Vous ayme en charite
Contes Vines perdras Vostre beaulte
Et quant la mort en fait le departir
Qui plus Vous ayme plus tost sen Veuult partir

Col et forceille qui est blanche ⁊ pollye
Ses mains ses bras qui font les accolles
Mesmes la langue quoy que les beaulx motz die
Se noble cuer ou chascune estudie
Pour le gaigner en faitz ou en pensees
Se tresbeau corps dont dames sont louees
Tout pourrira ⁊ notez bien ces Vers
Et la par mort toutes menges de Vers

CSe Vous Vives le droit cours de nature
Dont soixante ans est pour Vng bien grant nôbre
Vostre beaulte changera en laidure
Vostre sante en maladie tresp dure
Et ne seres en ce monde que encombre
Se fille auez Vous luy ferez Vng Vmbre
Celle sera requise ⁊ demandee
Et de chascun la mere habandonnee

Exemple du miroir dentendement par la mort

Quest deuenue semperiere de Romme
Dame Elienor fille de Portugal
Qui des Vertus eut sans nombre & sans somme
La mort la pris qui tout fiert & assomme
En ces beaulx iours comme Vng petit Vassal
Mires Vous cy cest cas especial
Entendement Vous monstre par mirer
Que de la mort ne pouez respirer

C Quest deuenue ma dame la Dauphine
Fille descoffe triumpicante & pompeuse
Qui de France deuoit estre la Royne
Sans espargnez non plus que Vne meschine
La mort la prinse par oeuvre rigoureuse
Mirez Vous cy ne soyez oublicuse
Et Vous souuiengne que la mort est rebelle
Et quel nespargne la laide ne la belle

C Quest deuenue ma dame de Castille
De Bourbon fille duchesse tant louee
La mort la mise aussi froide que marbre
En Vng cercueil comme on feroit d'ung arbre
Dedans la terre pourrir sans releuee
Mirez Vous cy attendans la iournee
Que Vous serez comme les autres mise
Car a la mort n'auetz point de franchise

C Quest deuenue de Knaastin la dame

Fille du duc de Choymbre tant noble
Quelle fut nee de Roys ⁊ de Royaulme
De grant Vertus chacun luy donne fame
Son renom Va iusques en Constantinoble
La mort la prinse ainsi que Vne non noble
Et fait pourrir au plus beau de ses iours
Virez Vous cy nattendez nulz secours

C Quest deuenue la princesse Dorenges
Tant renommee seur du duc de Brethaigne
La mort qui tient en ce monde ces changes
Ne lespargna non plus que les estranges
Mais la pourrist ⁊ en telz faitz se baigne
Tousiours occit par mont ⁊ par champaigne
Virez Vous cy Vous aurez Vostre tour
Et entrez en ce Val sans retour

C Quest deuenue cy la Royne Descosse
Fille de Guelbres tant gorriere ⁊ mondaine
La mort la prinse ⁊ mise en Vne fosse
Dont les Vers ont mengez chair ⁊ escorce
Et est en pouldre la dame treshaultaine
Virez Vous cy car cest chose certaine
Quil Vous conuient passer le dur passage
Qui ne se croit ie dis quil nest pas sage

C Quest deuenue celle qui de Nauerre
Fut princesse fille du duc de Cleues

Plus belle ne faillloit ailleurs querre
La mort la prinse en sa mortelle guerre
Et fait pourrir corps bras gembes ⁊ greues
Virez Vous cy car riens ny Vallent treues
Mourir conuient cest nostre destinee
Soit laide ou belle soit estrange ou prinnee

C Quest deuenue madame de Sauoye
Fille de Chippre qui tant fist a louer
Plus belle delle alleguer ne scaroye
La mort la print ⁊ emmena sa Voye
Comme la mendre dont on pourroit parler
Virez Vous cy en ce point fait a noter
Toutes moururent aussi toutes mourront
Et Vous yres le chemin quelles Dont

C Quest deuenue ma dame Dorleans
Si tresgorriere yssue de Bourgongne
Qui triumphoit en pompes ⁊ en biens
La mort la prinse ⁊ mise en ses lyens
Cest son delict et ce dont elle songne
Virez Vous cy ⁊ nen ayez Vergongne
Tous fault mourir sans longue demouree
Et ne scauons le temps ne la iournee

C Quest deuenue la Royne de Castille
Sy triumphante de Portugal yssue
Plus belle neut entre noble ou ciuile

La mort la prinse comme Vne poure fille
Et fait pourrir en la terre pollue
Virez Vous cy ce cas est de Value
La mort nous suyt tousiours sans arrester
Et ne pouons de ses mains euitier

C Quest deuenue la contesse tant bonne
De Charroloys fille au duc de Bourbon
Plus Vertueuse par escript ne se donne
La mort la prinse qui tout rompt ⁊ estonne
Et mise en cendre sans respit ne rancon
Virez Vous cy Voyez ceste lecon
Car de la mort nulle neschappera
Tresor auoir ne parens ny Vauldra

C Quest deuenue la feue Roync de France
De Sauoye fille noble dame Charlote
Puissant de corps de moult belle apparence
La mort la prinse de fait ⁊ de puissance
Et fait mourir ainsi que Vne pelote
Virez Vous cy car compter fault a Hoste
Toutes estes dune mesme nature
Toutes mourres pour Vray sans aduentures

C Quest deuenue madame Claucestre
Fille D'ioze seur au Roy D'angleterre
Doulce plaisant de beau maintien ⁊ estre
La mort la prinse pour Atropos repaistre

La deesse qui nous rent a la terre
Virez Vous cy nottez bien ceste guerre
Qui commanca a Eue la premiere
Et durera insque a la derniere

C Quest deuennue ceste grande heritiere
De Bourgongne qui fut Archeduchesse
Bonne de faitz honneste de maniere
De ses subgettz si agreante & chere
Quoncques ne fut de plus aymee princeffe
La mort la prise en sa belle ieunesse
Virez Vous cy elle a paye sa rente
Et Vous apres ires la mesme sente

C A tant se taisent mes allegations
Pour mettre fin a ceste moy emprins
Entendement monstre par grans raisons
Que soy mirer en toutes les saisons
Nest pas chose qui ne soit bonne aprise
A bien mirer le saige peu ce prise
La Vie est courte & la beaulte peu dure
Qui trop si fye il na de raison cure


C Pource mes dames qui lisez ce ditter
Le bien soit prins le mal en non chaloir
Pour lamour dune que mon cueur a plus cher
Jay prinse la peine de ce liure traicter
Dont toutes autres en pourront mieulx Valoir

Je doncq La Marche meu d'aucun bon Vouloir
Querant Vertus ⁊ reboutant les blasmes
Lay baptise le parement des dames

C Si prens conge des dames humblement
Et a chascune delle me recommande
Mon seruice ie lay fait loyaulment
De cuer de corps de sens dentendement
Se faulte y a ie offre que ie l'amende
Le temps me monstre quil fault que ie me rende
Puis que ainsi est ie me rens ⁊ me donne
A Jhesucrist qui les pechez pardonne.

C Ly finist le parement ⁊ triumphe des da-
mes dhonneur Nouuellement imprime A
Paris par la Veufue feu Jehan Trepperel et
Jehan Jehânot/demourâs en la rue neufue
nostre dame a l'enseigne de l'escu de France
⁊ rimprime a Lille en Flâdre par Si p^r Ho-
remans imprimeur Pour Baillieu libraire te-
nât sa boutique sur le quay des grâds au-
gustins a Paris le .x. iour d'auril mil huit
cent lxx.





La Bibliothèque
Université d'Ottawa
Échéance

The Library
University of Ottawa
Date due

67 25 1974

01 NOV '85

12 11 83

02 JUIN 05 2007



a39003



002535903b

CE PQ 1565

.L2A75 1870

C00 (LA MARCHE, LE PAREMEN

ACC# 1386945

